

# 四教義

隋天台山修禪寺沙門智顗撰





清刻龍藏佛說法變相圖

四教義卷第一

伊五

隋天台宗修禪寺沙門智顛撰

夫衆生機緣不一是以教門種種不同經云  
 自從得道夜至泥洹夜所說之法皆實不虛  
 仰尋斯旨抑有由致所以言之夫道絕二途  
 畢竟者常樂法唯伊五一味寂滅者歸真然鹿野  
 鵝林之文七處八會之教非頓漸之異不定  
 祕密之殊是以近代諸師各為理釋今所立  
 義意異前規故略撰四教用義大都漸頓不  
 定祕密之蹤若能達斯旨者則如來權實信  
 矣無方至人本迹淵哉難究況復此漸頓不  
 定祕密之蹤皆無滯矣今明此義略開七重  
 第一釋四教名第二辯所詮第三明四門入  
 理第四明判位不同第五明權實第六約觀  
 心第七通諸經論第一釋四教名四教者一

三藏教二通教三別教四圓教此四通言教者以詮理化物為義大聖於四不可說用四悉檀赴緣而有四說說能詮理化轉物心故言教也化轉有三義一轉惡為善二轉迷成解三轉凡成聖故教以詮理化物為義也略為五意一正釋四教名二覈定三引證四料簡五明經論用教多少不同第一正釋四教名即為四一釋三藏教名二釋通教名三釋別教名四釋圓教名一釋三藏教名者此教明因緣生滅四聖諦理正教小乘傍化菩薩所言三藏教者一修多羅藏二毗尼藏三阿毗曇藏一修多羅藏者修多羅此或云有翻或言無翻言有翻亦有多家不同然多用法本出世善法言教之本故云法本即是四阿含經也二毗尼藏者毗尼此翻為滅佛說作

伊五

二

無作戒能滅身口之惡是故云滅即八十誦律也三阿毗曇藏者阿毗曇此翻云無比法聖人智慧分別法義也故云無比法若佛自分別法義若佛弟子分別法義皆名阿毗曇也然此三法通名藏者以含藏為義但解者不同有言文能含理故名為藏又言理能含文故名為藏今言三法之名各是一句三名各含一切文理故名藏也阿含即是定藏四阿含多明修行法也毗尼即是戒藏正明因事制戒防止身口之惡法也阿毗曇即是慧藏分別無漏慧法不可比也此之三藏的屬小乘故法華云貪著小乘三藏學者問曰如此對當義理可然而名乖詮次答曰說時非行時教起之次阿含為先修行之初本又為首又如八正道正見正思惟為先次正語等

六法皆名爲正如人行法眼前瞻路然後發足故大智論云目足備故入清涼池也問曰佛於三藏初開三乘大乘最勝何不以大乘爲正小乘爲傍耶答曰鹿苑初說四諦法輪俱隣五人見諦成道八萬諸天得法眼淨但

有小乘得道未有大乘故以小乘爲正也大智論云佛於阿含中雖爲彌勒授記亦不說種種菩薩行故大乘爲傍也問曰外人亦說戒定慧此有何異答曰外人所說戒定慧即是舊醫如彼蟲道舊醫戒有二一邪二正一邪者即是鷄狗等戒二正者即是十善道也舊定有二一邪二正一邪者即是九十六種道經所說鬼神邪定或能知世吉凶現神變相也二正者即是四禪四無量心四無色定及發五神通也舊慧有二一邪二正一邪者

即是因身邊見心發諸邪智撥無因果食糞裸形等也二正者即是因身邊見心發諸世智說有因果修諸善法也今佛說三藏教所明客醫戒定慧即是新醫從遠方來曉八種術初說四枯正術即是三藏教門明戒定慧也一戒者即是十種得戒發一切律儀無作如是五部毗尼所明身口諸善法也二定者即依八背捨入九次第定師子奮迅超越三昧願智頂禪六通四辯等也三慧者即是生滅四諦破身邊二見六十二見發真無漏成十一智三無漏根也此戒定慧外人尚不聞其名況有少分譬如驢乳牛乳乳色雖同若停驢乳則成臭糞若停牛乳便成酪酥醍醐也二釋通教名通者同也三乘同稟故名爲通此教明因緣即空無生四真諦理是摩訶

行之初門也正為菩薩傍通二乘故大品經云欲學聲聞乘者當學般若欲學緣覺乘者當學般若欲學菩薩乘者當學般若三乘同稟此教見第一義故云通教也所言通者義乃多途略出八義一教通二理通三智通四斷通五行通六位通七因通八果通教通者三乘通稟因緣即空之教理通者同見偏真之理智通者同得巧度一切智斷通者界內惑斷同行通者見思無漏行同也位通者從乾慧地乃至辟支佛地位皆同也因通者九無礙同也果通者九解脫二種涅槃之果同也通義有八而但名通教者若不因通教即不知通理乃至成通果也故諸大乘方等及諸般若有二乘得道者為同稟此教也問曰何故不名共教答曰共名但得二乘近邊

不得遠邊若立通名近遠俱便言遠便者通別通圓也三釋別教名者別者不共之名也此教不共二乘人說故名別教此教正明因緣假名無量四聖諦理的化菩薩不涉二乘故聲聞在座如聾如啞法華經明迦葉領解自述往昔聞方等大品淨佛國土成就眾生心不喜樂即其義也所言別者義乃多途略明有八一教別二理別三智別四斷別五行別六位別七因別八果別故名別教也教別者佛說恒沙佛法別為菩薩不通二乘理別者藏識有恒沙俗諦之理也智別者道種智也斷別者塵沙無知界外見思無明斷也行別者塵沙劫修諸波羅蜜自行化他之行也位別者三十心伏無明是賢位十地發真斷無明是聖位之別因別者無礙金剛之因也

果別者解脫涅槃四德異二乘也別義有八  
但名別教者若不因別教則不知別理乃至  
得成別果也問曰何故不說爲不共教而作  
別教之名答曰智論明不共般若即是不共  
二乘人說如不思議經今明別教如說方等  
大品二乘共聞而別教菩薩故用別名也兼  
欲簡非圓教別雖異通猶是未圓之號也四  
釋圓教名者圓以不偏爲義此教明不思議  
因緣二諦中道事理具足不別但化最上利  
根之人故名圓教也華嚴經云顯現自在力  
爲說圓滿經無量諸衆生悉受菩提記維摩  
經云一切衆生即大涅槃不可復滅也大品  
經具足品云諸法雖空一心具足萬行法華  
經云合掌以敬心欲聞具足道涅槃云金剛  
寶藏無所減缺故名圓也所言圓者義乃多

途略說有八一教圓二理圓三智圓四斷圓  
五行圓六位圓七因圓八果圓教圓者正說  
中道言教不偏也理圓者中道即一切法理  
不偏也智圓者一切種智圓也斷圓者不斷  
而斷無明惑斷也行圓者一行一切行也位  
圓者從初一地具足諸地功德也因圓者雙  
照二諦自然流入也果圓者妙覺不思議三  
德之果不縱不橫也圓義有八但名圓教者  
若不因圓教則不知圓理乃至得成圓果也  
問曰教理若圓何得更<sup>有五</sup>有行位因果之殊答  
曰只猶教理圓故便有智斷行位因果之殊  
如世間法書極能之本臨學之者得有階差  
雖復初臨劣於後臨本未曾異也第二覈定  
者明此四教通而爲語於一教中各有四教  
雖有四教覈其定實三義不成故各從一義

以受教名也即為四意一覈定三藏教二覈定通教三覈定別教四覈定圓教一覈定三藏教者問曰如三藏教說無常三乘同稟入道即是通教別為菩薩說弘誓六度此即別教為說一切種智令求佛果豈非圓教答曰今覈此教三義若言說無常通教三乘是通教者二乘聞無常發真斷結一世便入涅槃可是稟教見無常理菩薩雖稟無常之教三阿僧祇劫不發真斷結豈見無常之理故知無常通教之義不成雖說願行化物別教義不成者本論別教詮別理斷別惑初三藏教所明願行猶約生滅四諦而起見生滅四諦不及二乘豈是別教雖說一切種智勸菩薩慕果行因不名為圓者菩薩因中不得即具種智豈得論圓又此種智只照二諦不照中

道豈得圓也是則雖有三教覈義不成但名三藏教也二覈定通教者問曰通教說戒定智慧豈非三藏教道種智豈非別教說一切種智豈非圓教耶答曰雖有此三教覈義不成所以然者通教說無生戒定智慧一相無相不同三藏戒定智慧別相異也復次一得不失從勝受名故不說三藏之名受通教名也雖說道種智止相異也復次一得不失從勝受名故不說三藏之名受通教名也雖說道種智止言照界內俗諦非是說如來藏恒沙佛法之道種智故別教義不成雖復說一切種智止是照界內二諦明一切種智非照中道不思議二諦之一切種智故圓教義不成是則三教不成但名通教也三覈定別教者問曰別教亦說戒定智慧何故不名三藏

教亦說無生空理何故不名通教亦說中道一切種智何故不名圓耶答曰別教說恒沙佛法無量戒定智慧異前生滅戒定智慧故非三藏也雖說空理是不可得空非是但空不與二乘同見故非通也雖說中道一切種智非初住發心即具一切種智故非圓也是則三義不成但名別教四覈定圓教者問曰圓教亦有戒定智慧何故不名三藏亦有真空之理何故非通亦有歷別階級法門何故非別答曰圓教所說戒定智慧皆約真如實相佛性涅槃而辯豈同三藏偏淺戒定智慧乎佛性真空平等之理聲聞辟支佛所不能知何況得入故非通也種種法門位行階級無不與實相應攝一切法從初一地無不具足一切諸地是故非別三義不成但名圓

伊五

教也是則四教四名雖復互通而研其理實當教立名不可混濫若圓教攝三即是又多僕從而侍衛之也第三引證者夫欲申通佛法事須經論明文但佛教浩漫玄旨難尋若不立名辨義何以得知旨趣今明此義略爲三意一明無文立名作義以通經教二別引經論證三總引經論也一無文立名作義以通經教者問曰立四教名義若無經論明文豈可承用答曰古來諸師講說何必悉有經論明文如開善光宅五時明義莊嚴四時判教地論四宗五宗六宗攝山單複中假興皇四假並無明文皆言隨情所立助揚佛化其有緣者莫不承習信解弘宣問曰何意不依半滿五味幸出經文答曰佛教具有漸頓不定半滿五味各據一邊豈得通釋此諸教也

但使義符經論無文不足致疑大智論云法  
施者依附經法廣作義理為立名字皆名法  
施今一家解釋佛法處處約名作義隨義立  
名或有文證或無文證若有文證故不應疑  
無文證者亦須得意譬如神農扁鵲華陀皆  
古之聖賢所造藥對治撰集經方當時所治  
無往不差今人依用未必皆愈而今代凡醫  
雖約古方出意增損隨病處藥少有不差若  
深解此喻通經說法觀時事所宜作義立名  
亦有何失今釋此經一部前後作義立名此  
非一條若不體此意者何但四教之名而生  
疑也經論正赴往人機緣末代學問執見千  
端行道障起非一寧可守株待兔必貽斯責  
且佛教無窮恒沙非辭東流之者萬不一達  
智人君子希更詳焉二別引經論證四教者

前釋名已具引經文今更略出如我心云應  
學修多羅毗尼阿毗曇佛在世時豈無三藏  
之教也故成論云我今正欲論三藏中實義  
次證通教者此經淨名為迦旃延解說五義  
二百比丘心得解脫大品經三慧品明薩婆  
若智三乘同得中論云諸法實相三人共入  
次證別教者此經明以無所受而受諸受未  
具佛法亦不滅受而取證也無量義經云摩  
訶般若華嚴海空宣說菩薩歷劫修行即是  
別文涅槃經明五行正是別教意也大智論  
云結使有二種一者共二乘斷二者不共二  
乘斷不共斷者不共般若斷於別惑次證圓  
教者華嚴經云為說圓滿修多羅此經云諸  
佛解脫當於衆生心行中求大品經云欲以  
一切種智知一切法當學般若法華經多寶

如來歎言善哉釋迦牟尼佛乃以平等大慧  
爲大衆說如所說者皆是真實涅槃經云復  
有一行是如來行所謂大乘大般涅槃智論  
云三智其實一心中得如是尋討大乘經論  
四教義文處處有也三總引經論證者今影  
傍大乘經論立四教名義者如大涅槃經明  
四不可說有因緣故亦可得說四種之說以  
化前緣即是四教又涅槃經四種轉四諦法  
輪即是四教之意又法華經明三草二木稟  
澤不同譬方便說即三教也一地所生一雨  
所潤譬說最實事即圓教也中論破諸異執  
既洗淨說因緣四句通佛四說即是四教之  
意如此等四說法隨機化物即四教義四說  
即是四教之異名也第四料簡者問曰法華  
經云佛平等說如一味雨何曾有四說之殊

答曰上來處處引四不可說有四因緣故亦  
可得說者上未曾定有一說何曾定有四教  
耶故此經云佛以一音演說法衆生隨類各  
得解隨類異解者即是四教不同之相也且  
諸經明義不同自有說異解異說一解一說  
異解一說一解異無說無解故此經云其說  
法者無說無示其聽法者無聞無得若達此  
意四教點定立義何所疑哉問曰四教從何  
而起答曰今明四教還從前所明三觀而起  
爲成三觀初從假入空觀具有析體拙巧二  
種入空不同從析假入空故有三藏教起從  
體假入空故有通教起若約第二從空入假  
假中即有別教起約第三一心中道正觀即  
有圓教起問曰三觀復因何而起答曰三觀  
還因四教而起問觀教因何而起答曰觀教

伊五

十

皆從因緣所生四句而起問曰因緣所生四句因何而起答曰因緣所生四句即是心心即是諸佛不思議解脫不思議解脫畢竟無所有即是不可說故淨名杜口默然說也有因緣故亦可得說者即是用四悉檀說心因緣所生之四句赴四種根性十因緣法所成衆生而說也四種根性者一者下根二者中根三者上根四者上上根赴此四種根故因此教觀無礙而起普利衆生得成信法兩行之益此即若聖說法若聖默然之義也問曰大涅槃經云根有三種一者下二者中三者上根爲中根人於波羅奈轉于法輪爲上根人於拘尸那轉大法輪若下根人如來終不爲轉法輪今何得言有四種根性爲下根人說三藏教耶答諸佛教門隨緣不定或說一

根或說二根或說三根或說四根或言爲下根者說或言不爲下根者說言爲下根說者如法華經三草稟澤皆得增長言不爲下根說者即如引涅槃經文也問曰提謂經說五戒明人天善何意不開爲五教義耶答曰人天教舊醫所說世之常道不離生死法王出世欲化衆生令出火宅是以鹿苑三轉法輪人天得道以此爲實故有三藏教此經大品法華涅槃諸大乘經皆云於波羅奈轉四諦法輪又大智度論明結集法藏亦從鹿苑而起不取提謂經爲初也問曰若不開人天善何得法華經明三草二木稟澤也答曰三藏教明世間布施持戒禪定即是人天之教並是正因緣所生善法此已爲三藏所攝故不須爲五也問曰四教義與地論人四宗義同

不答曰若人問言四諦即是四大不此爲非問今不依四宗立四教者意乃多途略出三妨一四宗明義言方似滯二細尋研覈立名作義似如不便三四宗雖言富博一家徃望攝佛法意猶有所缺一四宗明義言方似滯者彼不約四不可說用四悉檀赴緣而說即成滯也二細尋研覈立名作義似如不便者彼之四宗毗曇見有得道可許因緣爲宗三假是世諦何得爲宗成論見空得道何不以空爲宗且智論明三藏教有三門入道一是有門二是空門三是假名門也又智論彈方廣義云取十喻直說一切法不生不滅失般若意豈得用夢幻爲不真宗也今語曰不真宗即是通教真宗即是通宗者宗則通真不真何意沒宗而用教真宗何意無教而立宗

宗若無教何得知真真宗若沒宗有教則同名通教若俱沒教留宗則同名通宗若俱安教則同名通宗教若留不真真則名通不真宗教通真宗教通不真宗可爲三乘通修通真宗亦應三乘通修也若言此通是融通之通者教亦是通真之通也此則兩名混同義無別也答曰楞伽經云說通教童蒙宗通教菩薩故以真爲通宗也又諮曰若爾是則前因緣假名不真皆是教童蒙不應悉立宗名也覈却並決意謂立四宗名義甚不便也今言四教者佛從初得道至大涅槃顯示一切法門無非言教也三設巧救四宗名義得立若比古今雖爲富博一家徃望攝佛法意猶大有所闕今採諸經論立四教義一教各有四門合十六門彼因緣假名兩宗似與此所

明三藏教有空二門相參猶闕毘勒門及非空有兩門也彼不真宗明諸法如幻如化似與此通教有門相參餘三門彼所不明彼真宗似與此別教有門相參餘三門彼所不明此則四宗明義但得與此三教四門相參此圓教四門彼所不明四教猶有十二門明義彼四宗所不明也又護身法師用五宗義四宗如前長立法界宗似與此圓教有門相用四教猶有十一門彼所不明也耆闍法參師六宗明義三宗似與此三門相參如上分別彼真宗似與此通教空門相參彼常宗似與此別教有門相參彼圓宗似與此圓教有門相參四教猶有十門彼六宗之所不明也故知四宗六宗雖言古今比來明義之富博今一家徃望攝佛法意猶大有所闕也所以前

明四悉檀義者正是迷一家通經說法與古今所說運用不同也故前明三觀豎破諸法略為數十番其尋覽者則知與諸禪師及三論師所說意有殊也今明四教一教各有四門四教即有十六門又開三藏教四門如五百阿羅漢各說身因即是五百門也故經說泥洹真法寶衆生從種種門入但三藏教四門上開無量門入道何況通教別教圓教各有四門而不得各開無量門也故華嚴經明善財童子見四十二善知識各言我唯知此一法門如是見一百二十善知識乃至無量善知識皆各言我唯能知此一法門是則大乘法門無量無邊也此經三十二菩薩各說入不二法門乃至八千菩薩皆說入不二法門故法華經云以種種法門宣示於佛道如

此法於不可說用四悉檀而起教門令一切衆生以佛教門出三界苦若留心此意比決四宗五宗六宗自知殊別也第五明經論用四教多少不同若華嚴頓教用別圓兩教若漸教之初小乘經但用三藏教若大集方等則具有四教若摩訶般若用通別圓三教法華但用圓教大般涅槃名諸佛法界四教皆入佛性涅槃諸論隨經用教多少義類可解問曰四教遍通衆經何故偏於此經文前廣辯答曰一切漸頓諸經未必皆明四教唯方等大集及此經具有四教之文故約此經玄略明四教義也但每嗟末代弘法之人採衆經義用通一論致使後生皆謂論富經貧輕經重論今採衆經論立四教義以通諸大乘經者意望後賢敬重佛言棄乎枝葉若能專

心大乘方等聽受讀誦書寫如說修行非但功不唐捐契理之要也第二辯所詮者夫教是能詮理是所詮故因理設教顯理即理非教即教非理離理無教離教無理故思益經云菩提之中無文字文字之中亦無菩提離菩提無文字離文字無菩提以離菩提無文字故約理而施教離文字無菩提故即教能顯理是則教爲能詮理爲所詮意在於此所言理者即是諦也今約諦明理起教教能詮理教是能詮理是所詮今明詮義略爲四意一約四諦之理以明所詮二約三諦之理以明所詮三約二諦之理以明所詮四約一諦之理以明所詮也一約四諦明所詮者即爲三一明所詮四諦之理二明能詮之教三明約經論一明所詮四諦之理者有四種四諦

一生滅四諦二無生四諦三無量四諦四無  
作四諦問曰何處經論出此四種四諦答曰  
若散論諸經赴緣處處有此文義但不聚在  
一處大涅槃經明慧聖行欲爲五味譬本是  
以次第分別明此四種四諦勝鬘亦有四種  
四諦之文所謂有作四諦有量四諦無作四  
諦無量四諦但涅槃勝鬘明無量四諦詮次  
不同義意少異問曰前明生滅四諦是三藏  
教半字之義此事可然次明無生無量無作  
云何分別答曰若作滿字明義三種四諦同  
是滿教不須分別若五味明義三種四諦義  
則不同無生四諦此雖大乘猶通二乘無量  
四諦但是菩薩所行之道無作四實諦乃是  
佛之境界此爲異也一明約生滅四諦之理  
明所詮者即是因緣生滅次明諦理故法華

云昔於波羅柰轉四諦法輪分別說諸法五  
衆之生滅生滅即是起作故勝鬘經明有作  
四諦也所言四諦者一苦二集三滅四道所  
言苦者逼切爲義無常三相逼切色心故名  
爲苦審實不虛名之爲諦所言集者招聚爲  
義煩惱業合能招聚生死苦果故名爲集審  
實不虛爲諦所言滅者滅無爲義無有子果  
二縛故名爲滅審實不虛爲諦所言道者能  
通爲義戒定智慧能通至涅槃故名爲道審  
實不虛目之爲諦此是生滅四諦故涅槃云  
聲聞有苦有苦諦有集有集諦有滅有滅諦  
有道有道諦也問曰滅道聖人行因得果可  
言審實苦集虛妄何名審實答曰凡夫虛妄  
因果虛妄非不虛妄是則有漏無漏因果皆  
悉審實不可混濫故遺教經云日可冷月

伊五

十七

可令熱佛說四諦不可令異釋此生滅四諦義備如數人成論分別今不具明二明無生四諦者如思益云知苦無生名苦聖諦知集無和合相名集聖諦以不二相觀名道聖諦法本不生今則無滅是滅聖諦是則苦集滅道四法名字事相是同而諦義有異前以生滅之理爲諦今明不生不滅真空之理爲諦亦名四真諦也故涅槃云菩薩解苦無苦是故無苦而有真諦解集無集是故無集而有真諦有滅有真故名四真諦三乘共觀得第一義證二種涅槃亦是勝鬘經明有量四諦也問曰若是三乘通學涅槃何故解滅明常樂我淨耶答曰若方等般若所明無生真諦三乘共見而二乘通教菩薩不見佛性不明滅諦是常住也至大涅槃爲三乘人同說佛

性故無生四真諦通別圓故明滅諦四德異於方等大品意在於此也三明無量四聖諦者如大涅槃說知諸陰苦名爲苦諦分別諸陰有無量相悉是苦是名無量苦諦無量集滅道至下自當具出經文如是四諦之理涅槃云悉非聲聞緣覺所知皆是別教所詮文理也問曰此無量四聖諦是何等四諦無量耶答曰今明四教所詮菩薩學道種智並得論無量四諦但此無量四諦的屬別教也問曰若爾涅槃明四諦無量相何得定知是別教所詮無量四諦耶答曰若不<sup>十五</sup>明佛性而說無量即是前二教所詮無量也若明佛性說無量者則任運自成後兩教所明無量也若圓教亦名無量四聖諦者即是無作實諦之異名也四明無作四諦者如涅槃明約一實

諦而辯四諦即是無作四實明四實不作四  
故名無作觀四得實故名四實諦也涅槃云  
所言苦者為無常相是可斷相是為實諦如  
來之性非苦非無常非可斷相是故為實虛  
空佛性亦復如是無作集滅道諦在下當具  
引經涅槃此文即無作實諦之明說也若能  
依經解此四諦即一實是為圓教所詮之理  
勝鬘經明無作四諦無一實結成涅槃不云  
無作皆用一實結成四諦義既相關今合兩  
經立名故言無作四諦也問曰勝鬘云明無  
量四聖諦無作四聖諦涅槃亦有是說二處  
經文為同為異答曰有無量四聖諦雖依藏  
識非無作若無量四聖諦亦依藏識即是無  
作所以者何若約無明恒沙四法事數論無  
量即是別教所詮無量非無作若約法性明

四諦無量即圓教所詮無量無量即無作也  
涅槃答迦葉明無量四諦正約教數無量此  
別教所詮也若答文殊明四諦即是明無作  
四實諦勝鬘明二種四諦一異未可判定別  
問曰勝鬘明無量四諦何故在無作四諦後  
答曰勝鬘云依伊五無作說無量但依十義有三種  
一依果說因無量即是無作之因也二明依  
理說義無作之理不可思量無量也三依體  
說用無量即是無作之數量也若解此三義  
次無作後說無量四諦不足致疑也問曰無  
生無作何異真之與實何異答曰若覈名詮  
義一往難者恒強取意通釋佛意不無各有  
所主二明能詮之教者即是四教能詮四種  
四諦之理即為四意一初三藏教詮生滅四  
諦之理但生滅四諦之理即是涅槃經明生

生之義生生既不可說云何說三藏教能詮此理涅槃經云有因緣時亦可得說即是四悉檀善巧故能詮也若是世界對治爲人用此三悉檀說生滅四諦此約隨情辯能詮用第一義悉檀說生滅四諦即是約隨智辯能詮也若無情智之機則不可說此二機發則可以方便赴機善巧說生滅四諦故法華經云諸法寂滅相不可以言宣以方便力故爲五比丘說是名轉法輪便有涅槃音及以阿羅漢也二明通教詮無生四真諦之理無生四諦即是大涅槃明不生主義不生既不可說云何說通教能詮此理又涅槃經云有因緣故亦可得說即是用四悉檀因緣說也若世界爲人對治三悉檀故說無生四諦此約隨情辯能詮也若用第一義悉檀說無生四諦

伊五

二十

即是約隨智辯能詮也若無情智之機則不可說此機若發則以方便赴機若巧而說三乘向道之人聞說即入見第一義諦無言說道斷見思煩惱也三明別教能詮無量四諦之理無量四諦即是涅槃明不生主義不生既不可說云何說別教能詮此理又涅槃經云有因緣故亦可得說即用四悉檀因緣說也若用世界爲人對治善巧方便而說無量四諦即是隨情辯能詮也若用第一義悉檀即是隨智辯能詮若無情智二機則不可說此二機發則可以方便赴機而說別教菩薩聞說即入十行迴向登初地也四次明用圓教詮無作四諦之理無作四諦之理即是大涅槃明不生不生不生既不可說云何圓教能詮此理又涅槃經明有因緣故亦

可得說即是用四悉檀因緣說也若世界爲人對治三悉檀說無作四實諦乃得隨情辯能詮耳若用第一義悉檀說無作四實諦即是隨智辯能詮也若無情智之機即不可說此二機發則可說也利根大士聞說即開佛知見見佛性理住大涅槃也三明對治經論者即爲二意一對經二對論一對經者若華嚴經用別圓兩教詮無量四諦無作四諦之理小乘三藏漸教之初但詮生滅四諦之理大集方等及此經用四教伊五詮四諦之理于摩訶般若用三教詮三種四諦之理法華但用一教詮無作四實諦理大涅槃通用四教詮四種四諦之理事如前引涅槃文即其義也二明對論者別通經論類經可知若通申經論如中論破一切內外顛倒執諍外人問

曰若一切世間皆空無所有者即應無生無滅以無生滅故則無四諦四沙門果三寶若受空法有如此等過論主答曰汝今實不知空因緣諸佛依二諦爲衆生說法若不知二諦則不知真佛法以有空義故則一切法得成若無空義一切則不成一切法成者有四諦四沙門果三寶也今釋此語論主破執見既盡明有四諦四沙門果三寶者即是摩訶衍中三種四諦三種四沙門果三種三寶也問曰云何得知答曰論主說偈故知有偈云因緣所生法我說即是空此偈申通教大乘無生四諦四沙門果三寶也偈云亦爲是假名即是申別教大乘詮無量四聖諦四沙門果三寶也偈云亦是中道義即是通圓教大乘詮無作四實諦四沙門果三寶也破申之

意大乘三教亦用一偈作論之巧妙在於此  
次後說兩品初品云問曰已知摩訶衍入第  
一義今欲聞聲聞法入第一義論主具明生  
滅十二因緣破六十二見入第一義即是為  
鈍根聲聞弟子說因緣生滅因緣即是生滅  
四諦四沙門果三寶也中論前申摩訶衍通  
別圓三教三種四諦四沙門果三寶後兩品  
申三藏生滅四諦四沙門果三寶者以後世  
人根轉鈍應須還用此教是則中論文略而  
義富申佛教既明於四諦之理已顯故言有  
四諦也乃是如意珠論非水精珠論也若不  
解此義單復織假恐唐棄功夫四假通佛大  
小乘經意終難見也第二約三諦明四教所  
詮之理者即為三意一明三諦所詮之理二  
明能詮四教三約經論一明三諦所詮理者

三諦名義具出瓔珞仁王經一者有諦二者  
無諦三者中道第一義諦所言有諦者二十  
五有世間衆生妄情所見名之為有如彼情  
見審實不虛名之為諦故言有諦亦名俗諦  
亦名世諦者如涅槃云如世人之所見者名  
為世諦二無諦者三乘出世之人所見真空  
無名無相故名為無審實不虛目之為諦故  
言無諦亦名真諦亦名第一義諦故涅槃云  
如出世人之見故名為第一義諦三中道第  
一義諦者遮二邊故說名中道言遮二者遮  
凡夫異見有邊遮二乘所見無名相空邊遮  
俗諦真諦之二邊遮世諦第一義諦之二邊  
遮如此等之二邊名為不二不二之理目之  
為中此理虛通無壅名之為道最上無過故  
稱第一深有所以目之為義諸佛菩薩之所

伊五

三二

伊五

三三

證見審實不虛謂之爲諦故言中道第一義諦亦名一實諦亦名虛空佛性法界如來藏也故涅槃云凡夫著有二乘著無菩薩之法不有不無即是三諦之理不同之義此理並爲四教所詮故約三諦之理明所詮也問曰所言三諦之理爲是隨情爲是隨智之理答曰今一家明義所辯諦理有三種不同一者隨情二者隨情智三者隨智此義別當料簡今且用一途依涅槃判三諦之理也是則一是隨情之理二是隨智之理又云二是隨情之理一是隨智之理情智合說以爲三諦之理也二明能詮之四教三諦理者即爲四一三藏教但詮二諦之理所以稟教之流不聞佛性常住涅槃三乘猶在灰斷之果也二通教亦但詮二諦之理所以稟教之流亦不聞

佛性常住涅槃三乘猶在灰斷之果也三別教別詮三諦之理所以稟教之流三十心但成二觀二智之方便道登地方乃見性入流也四圓教證一諦之理是故稟教之流初心即開佛知見自然深入薩婆若海也三明對經論華嚴但假名俗諦中道或云華嚴教詮別相三諦一心三諦三藏漸教詮真俗二諦方等大乘之教詮三諦一往同華嚴摩訶般若亦具詮三諦一往同華嚴法華但詮一心三諦涅槃備詮三諦一往亦同華嚴也諸論隨經類之可知伊五中論云因緣所生法二十我說即是空此即詮真諦亦爲是假名即詮俗諦也亦是中道義即詮中道第一義諦也此偈即是申摩訶衍詮三諦之理若下兩品明聲聞雖入第一義此即是別申三藏教詮二諦之

理也第三明約二諦明所詮者亦為三意一  
正明所詮之理二明能詮之教三約經論一  
明所詮之理者即是二諦之理也二諦有二  
種一者理外二諦二者理內二諦若真諦非  
佛性即是理外之二諦真即佛性即是理內  
之二諦也一理外二諦有二種一者不即之  
二諦生滅二諦也二者相即之二諦無生二  
諦也故大品云即色是空非色滅空色滅方  
空是不即之二諦即色是空相即之二諦也  
二明理內二諦亦有二種一不即之二諦二  
相即之二諦不即之二諦是無量二諦也故  
涅槃云分別世諦有無量相第一義有無量  
相非諸聲聞緣覺所知也二相即之二諦無  
作之二諦也無作苦集滅道名為世諦即一  
實諦故名第一義二明能詮之四教者若三

藏教詮於理外不即之二諦若通教詮於理  
外相即之二諦別教詮於理內不即之二諦  
圓教詮於理內相即之二諦也三對經論文  
華嚴詮理內二種二諦三藏教詮理外不即  
之二諦方等大集詮理內理外四種二諦摩  
訶般若詮理外相即二諦理內二種二諦法  
華但詮理內相即之二諦涅槃經通詮理內  
理外四種二諦諸論通經類之可解中論云  
因緣所生法我說即是空此申理外相即之  
二諦亦為是假名亦是中道義此申理內不  
相即相即之二諦後兩品明聲聞入第一義  
即是申三藏教理外不相即之二諦也第四  
明二諦之理辯所詮者亦為三意一者正明  
所詮之理二明能詮之教三約經論一明所  
詮之理者即是一諦之理也何等名為一諦

諦名審實審實之法即是不二豈有三諦二諦皆名審實今明真俗說為諦者但是方便實非諦也故涅槃云所言二諦者其實是一如來方便為化衆生故說為二譬如日月不轉醉人見轉當知唯有不轉之日不醉之人同見豈別有迴轉之日若實有轉日者不醉之人亦應並見也一諦如真日二諦如轉日真日審實可名一諦轉日不實何有二諦方便說二實義不成故非諦也今以此一實為所詮之理也二明能詮之教者若三藏教通教正是煩惱惡酒未吐唯詮轉日說有二諦不能證一實諦也若別教詮一實諦如醉轉日圓教詮一實諦轉日即不轉日也三對經論者若華嚴教詮一實諦帶理內世諦不即之方便三藏教一向不詮一實諦也若方等

伊上

二十六

教詮一實諦同華嚴有偏真會一實諦之方便摩訶般若教詮一實諦亦同華嚴亦帶偏真會實諦之方便故無量義經云佛成道已來四十餘年未顯真實今謂何有不說實諦但或時赴緣開二諦三諦不即一諦之方便所覆法華教詮一實諦無復不即之方便但詮一切即一實諦也故法華說二萬日月燈明佛皆云諸法實相義已為汝等說今佛放光明助發實相義諸佛法久後要當說真實正直捨方便但說無上道若涅槃經同方等通釋入佛性為異諸論隨經類之可解如中論云亦名中道義此即是申一實諦之教也故青目釋云遮二邊故名為中道即是遮因緣空邊假邊非此二邊則非遮真俗二諦名一實諦也故涅槃云一實諦則無二也又云

無二之性即是實性無二之性即是入不二法門又一實諦者即是不生不生不生不生不可說故是故淨名默然杜口文殊稱歎意在於此也第一卷竟第三明四門入理者尋真性實相之理幽微妙絕一切世間莫之能契但以大聖明鑒通理之門乃於無言之理赴緣起教以教爲門是以稟教之徒因門契理故法華云以佛教門出三界苦又云其智慧門難解難入淨名經明諸菩薩各說入不二法門即其意也今略以五意解釋一略辯四門相二正明四門入理三悉檀起四門教四約十法成門義五信法兩行四門不同也第一略辯四門相者門以能通爲義佛教所詮正四句法通行人至真性實相之理故名爲門若外人邪因緣無因緣法四句因此四

句各見四種邪法之理因此生十四難六十二見起諸結集沉輪生死此是邪道四門今所不迷若佛法四門即是正因緣四句法能通行人同入第一義涅槃故大智論云四門入清涼池又般若如火聚四邊不可觸又云般若波羅蜜有四種相即四門義仰尋佛法既有四教不同今約教明門各有四別一三藏教四門二通教四門三別教四門四圓教四門一明三藏教四門即爲四一有門二空門三有空門四非有非空門一有門者即三藏教明正因緣生滅之有若稟此教能破十六知見見陰界入一切有爲諸法皆悉無常苦空無我得世第一法發真無漏因有見真有即第一義諦之門也故大集云甚深之理不可說第一實義無聲字聲聞弟子陳如比

丘於諸法獲得真實之知見此即諸阿毗曇論之所申也二明空門者即是三藏教明析正因緣假實法生滅入空若稟此教能破假實之感見假實空發真無漏因空見真空即第一義之門也故須菩提在石室觀生滅無常入空因空得道名見佛法身恐此是成實論之所申也三明有空門者即三藏教明正因緣生滅之有空若稟此教能破偏執有無之惑見因緣有空發真無漏因有空見真有空即第一義之門也此是迦旃延因入道故作毘勒論還申此門也四非有非空門者即三藏教明正因緣生滅非有非無理若稟此教能破有無邊邪執見因緣非有非無發真無漏因非有非無見真非有非無即第一義之門也惡口車匿因此入道未見論文有人

言犢子阿毗曇申此意也彼論明我在第五不可說藏中我非三世即非是見有非無爲法即是非空也此恐未可定用二明通教四門者即是智論明一切實一切不實一切亦實亦不實一切非實非不實佛於此四句廣

說第一義悉檀中論明此四句皆名諸法之實相即通教明正因緣法如夢幻響化水月鏡像體法即空之句也若三乘共稟此教而根緣不同各於一句入第一義故四句皆名門也此具如青目注解又注云諸法實相有三種故知此四門即是三乘同入此四門得見第一義也三明別教四門者若用中論亦名假名而辯四門者即別教之四門大智論四句亦得也此別教四門意正出大涅槃經但多散說約乳明四句譬即是別教四門也

若明佛性如乳有酪性石有金性力士額珠  
即是有門若明石無金性乳無酪性衆生佛  
性猶如虛空大涅槃空迦毗羅城空即是空  
門也涅槃又云佛性亦有亦無者云何爲有  
一切衆生悉皆有故云何爲無從善方便而  
得見故又譬如乳中有酪性亦無酪性即是  
亦有亦無門也若明佛性即是中道百非雙  
遣故經譬云乳中非有酪性非無酪性即是  
非空非有門也別教菩薩別稟此四門之教  
因見佛性住大涅槃故此四句之說即是別  
教之四門也今一往約涅槃經分別別教四  
門之相但此經文或可圓教四門至下圓教  
四門自當料簡同異也問曰若別教四門但  
出涅槃爾前諸摩訶衍經何意無別教四門  
也答曰大涅槃經是解釋前教之經此前摩

訶衍豈無別教四門具出經文事成繁也四  
明圓教四門者四門明入佛性第一義一往  
與別教四門入第一義諦見佛性得常涅槃  
名義是同細尋意趣有異問曰以何相知異  
耶答曰分別有異意乃多途今略約圓教七  
義分別即知別教四門與圓教四門有殊也  
七義者一若明一切法即真性實相佛性涅  
槃不可謂復滅而明四門者即是圓教四門  
也二若初心即開佛知見圓照而辯四門者  
即圓教四門也三若明不思議不斷煩惱而  
入涅槃辨四門者即是圓教四門也四若明  
圓行而辯四門者即是圓教四門也五若明  
圓位而辯四門者即是圓教四門也六若明  
圓體而辯四門者即是圓教明四門也七若  
明圓用而辯四門者即是圓教明四門也第

二正明四門入理者若外人四門心行理外諸顛倒相與顛倒相應不得入真性理所以者何隨心異故見理亦異是故各說謂得一究竟遂起諍論也今明佛性四門皆得入一理但有兩種不同一者三藏通教兩種四門同入偏真之理二者別圓兩教四門同入圓真之理一明三藏四門通教四門同入偏真之理者各因四門同見第一義得二種涅槃是同也理雖是一而門有異者見有巧拙兩度之殊故有兩種四門能通之別也真理無二故所通至理是一也譬如州城開四門使君是一從四門入者門雖有殊而所見使君只是一也三藏教四門如從州城四邊偏門入通教四門如從正門而入偏正雖殊入見偏真第一義諦得二種涅槃是一也二明別

教四門圓教四門同入中道實相真性理者各因四門而入見實相佛性得常樂涅槃是一也理雖是同而門有異者教門既有偏圓之殊故有兩種四門能通之異也佛性真理不二故所通至真性理是一也伊五譬如臺城有四門門雖不同所見天子是一也三別教四門如從臺城四邊偏門而入圓教四門如從四正門而入偏正雖殊入見真性解脫實相之理是一也第三明用四悉檀起四門之教者若外道四門皆不見根緣執心計相定說如舊醫常用乳藥治一切病此不因四悉檀而起四門也今佛法四門皆因四悉檀而起也一明悉檀起三藏教四門二明悉檀起通教四門三明悉檀起別教四門四明悉檀起圓教四門一明四悉檀起三藏教四門者即是

生生不可說有四悉檀因緣亦可得說一明用四悉檀起有門者若衆生心樂有法即用世界悉檀說毗曇有門若宜聞生善即用各各爲人悉檀說於有門若執無因緣邪因緣或執空計著起諸結業即用對治悉檀爲說有門若聞即悟見第一義即用第一義悉檀爲說有門如拘隣五人聞說四諦即見第一義諦得須陀洹果若不能用四悉檀赴緣而說者即是差機說法是衆生怨共天魔外道一手作諸勞侶涅槃云說法者諸佛境界非諸聲聞緣覺所知也二用四悉檀起空門者類前有門用四悉檀起空門義即成也而諸成論師云昆曇有門但是調心不能得道成實見空乃得道耳諸數論師云我用小乘明義見有得道汝採用大乘明義故說見空得

佛五

三十三

道今謂此並不得三藏教意大集經云常見之人說異念斷也斷見之人說一念斷二見雖殊得道無異大智論云聲聞經中處處明法空義豈得言見空得道探明大乘今約此四悉檀意作成壞義數人四義成論四義壞成論四義成數人四義壞是則成壞敵等何者是成論成何者是數人壞若解三藏教巧拙度則成論空門義成數人有門義壞三用四悉檀起有無門類前有門用悉檀意則有空門得起故爲昆勒論之所通也四用四悉檀起非有非無門者亦類前有門用四悉檀意可見也二明四悉檀起通教四門者通教四門雖知幻化但有名字即是生不生不可說而衆生四種根緣不同若用四悉檀赴緣即得起四門也用四悉檀起教類前

可知也三用四悉檀起別教四門者不生  
生不可說以四悉檀因緣故得赴緣起別教  
說四門也但地論師明阿黎耶識是如來藏  
即是用別教有門通三論人曰汝是不真宗  
亦是啜水義三論師明諸法畢竟無所有此

是別教空門通地論師曰汝是外人冥初生  
覺義亦是黃蜂蝶義執諍不稊何可融會耶  
今謂此是不得別教四門之意不知四悉檀  
說此有空兩門義也四明四悉檀起圓教不  
生不生不可說以四悉檀因緣起圓教說四

三十五

三十三

門也第四明十法成四門義者外人亦說四  
門但不爲十法所成故諸顛倒流轉生死不  
得解脫今佛法四門皆爲十法所成必得涅  
槃故不同外人也就此即爲四一十法成三  
藏教四門二十法成通教四門三十法成別

教四門四十法成圓教四門一明十法成三  
藏教四門者四門即爲四一明用十法成毗  
曇有門見有得道者十法名目具如前出但  
知正因緣法成見有得道者知無明因緣生  
一切法破一切外人計無因緣耶因緣生一

切法也二真正發心成見有得道者知無明  
因緣有三界一切生死苦覺悟心生欲斷無  
明結業正求涅槃此心真正過一切天魔外  
道之心也三止觀進行成見有得道者因止  
觀能發無漏定慧不同外人不知鑽搖漿猶  
難得況復生酪酥也四破法遍成見有得道  
者用生滅無常破身邊二見單四見複四見  
具足四見六十二見無量諸見皆知從無明  
因緣生心不愛著涅槃云是外道無有一法  
不從緣生從緣生法悉皆無常云何外道有

常樂我淨如此諸見四倒悉能遍破不同外道也五善知通塞成見有得道者知無量諸見皆有道滅故為通悉有苦集故為塞不同外道如彼蟲道不知是字非字也六善修三十七品成見有得道者三十七品調適行對

伊五

三十四

涅槃開三解脱門不同外人如佛為須跋羅經中作師子吼八正道外人尚無一分決定不得四沙門果也七對治助開成見有得道者五停心觀發諸禪定背捨勝處不同外人根本味禪起愛見慢之三病也八善知次位成見有得道者知七賢七聖之位心不叨濫起增上慢不同外人戒計見取計生死法為涅槃也九安忍強軟兩賊成見有得道者能忍八風內外三障四魔心不退轉不同外人不能安忍細微遮道法也十順道法愛不生

成見有得道者四善根人發得善有漏五陰大涅槃經說我弟子有外道則無若不生法愛則不頂墮進入忍法成世第一法發苦忍真明十六剎那證須陀洹果若入超果人即成羅漢故知十法成見有得道聲聞乘辟支佛乃至大乘故知毗曇見有得道此非虛說也二明十法成空門三明十法成有空門四明十法成非空非有門悉得見第一義證二種涅槃類有門十法所成意可知也今佛法中義學坐禪若不深得此意但言見有見空得道與外人有何殊也故大智論云若無方便入阿毗曇即墮有中入空門即墮無中入毘勒門即墮有無中中論云若非有非無即是愚癡論也二明十法成通教四門三明十法成別教四門四明十法成圓教四門皆得

伊五

三十五

入道類前可知若偏取四門執諍戲論不深得十法入道意者皆為邪見之所燒也故大智論云般若波羅蜜譬如火炎四邊不可取邪見火燒故是事前於四教中已處處分別第五明信法兩種四門不同者外人不信三寶不學佛法邪信行雖有四門非佛弟子豈成信法兩行今明佛弟子深信佛教習佛法能發無漏故成信法兩行若信行人即是四種教門若法行即是四種觀門是則信行人以佛教門出三界苦約教各有四種教門

一往則有十六教門十六種信行人約四教各有四種觀門一往則有十六觀門十六種法行人若細分別四教所有信法兩行教門無量無邊信行亦無量無邊觀門無量無邊法行亦無量無邊直論三藏四門五百羅漢

各說身因即是五百觀門況復此經諸菩薩各說入不二法門善財入法界見無量善知識各各說所得法門皆從四教三十二門離出也若四不可說故文殊師利說一切無言無說空諸戲論名入不二法門淨名杜口默然無說文殊稱歎是真入不二法門當知一切法門皆不可說也

四教義卷第一

音釋

鵠胡谷切 覈胡得切 啞倚下切 級居立切 濫階次也  
 盧暇切 水撰離產切 撰述也 析思積切 鬘音料  
 度切 敵杜歷切 蠟力約切 生朝生

伊五

三六

四教義卷第二

伊六

隋天台山修禪寺沙門 智顛撰

第四約四教位分別淨無垢稱義者即為六  
 意一約三藏教位明淨無垢稱義二約通教  
 位明淨無垢稱義三約別教位明淨無垢稱  
 義四約圓教位明淨無垢稱義五約五味以  
 結成六明經論辯多少第一約三藏教明位  
 釋淨無垢稱義者尋佛三藏計緣多種元其  
 正要不出四門入道一有門二空門三有無  
 門四非有非無門但四教各明四門雖俱得  
 入道然隨教立義必須逐便若是三藏教四  
 門雖俱得入道而諸經論多用有門通教四  
 門雖俱得入道而經論多用空門別教四門  
 雖俱得入道而經論多用亦空亦有門圓教  
 四門雖俱得入道而經論多用非空非有門

也今明三藏教四門入道正用毗曇有門以  
 判位也若論逗機化物計緣而說四門豈可  
 偏用明義隨便事須如此四門義至下辯體  
 中當略解釋今就三藏教有門明入道階位  
 即是毗曇論主之所用也約此有門明位釋  
 淨無垢稱義即為三意一略開三乘二明三  
 藏教三乘位不同三釋淨無垢稱義一略開  
 三乘者佛於生生不可說非三之理用四悉  
 壇約苦集滅道開三乘教門赴三種行人之  
 根緣令同得滅諦涅槃也故法華經云為求  
 聲聞者說應四諦法度生老病死究竟涅槃  
 為求辟支佛者說應十二因緣法為求菩薩  
 者說應六波羅蜜法令得三菩提一切種智  
 若聲聞小乘教門苦諦為初觀四諦入道發  
 真無漏斷正使盡位證羅漢具足三明及八

伊六

二

解脫既無慈悲度物現身而入涅槃故大智論說如麀在獵園驚怖跳出都不顧羣今不約此判淨名位也若緣覺中乘教門集諦爲初觀十二因緣發真無漏斷三界結盡侵除習氣具足三明及八解脫雖有少慈悲不能度物亦於一世即入涅槃故大智論云如鹿在獵園驚跳自出雖顧眄羣怖不停待今亦不就此判淨名位若菩薩大乘慈悲弘誓不捨衆生爲物心大教門以道諦爲初修行六度化一切衆生共出三界至成佛果利益功圓方入涅槃故大智論云如大香象在於獵園雖遭刀箭擁羣共出此是大士位懷故須約此判淨名位也問曰此說不思議大乘蒼藟之教何須說小乘除糞器乎答曰今欲明小乘法遠因以明除糞之器者不無諸所爲

今略出十意一爲用故如維摩大士爲諸國王長者說無常不淨苦空之法二爲破故如破十大弟子五百羅漢如先有砧方可用槌三爲攝受故如室內所明說身有苦而不樂於涅槃又云亦不與聲聞辟支佛而相違背四爲會通故如大品經廣乘品會宗之所明五爲開塞故法華云決了聲聞法是諸經之王涅槃又云爲諸聲聞開發慧眼六爲末代聽學小乘經論觀行之人未善通達若爲外邪見人內邪見人所破即便退沒七爲破末代僻說小乘大乘教人壞亂佛半滿正教所以者何如有人言毗曇見有得道成實見空入道道非有無何得言見有見空得道耶是則兩論申佛小乘有空教門便成無用中論何故言欲聞聲聞入第一義耶是則駭佛四

枯之教八爲破末世坐禪內證豁虛解慧開發或同尼捷破戒行惡食糞裸形謂是大乘或復持戒坐禪同彼鬱頭藍弗是亦空修梵行也九爲令一家義學善別內外孟浪之說明識大聖枯榮教門十爲令一家禪學別識一切內外邪非精通大小乘觀取捨得宜正入佛道也二明三藏教三乘位不同者卽爲三意一明聲聞乘位二明緣覺乘位三明菩薩乘位一明三藏教聲聞乘位者但三藏教具有四門明聲聞位今正約毗曇有門解釋

次下略明空門辯位就有門明位卽爲二意一明七賢位二明七聖位一明七賢位者一五停心觀二明別相四念處三總相四念處四煖法五頂法六忍法七世第一法是爲七賢之位也通言賢者隣聖曰賢此七位皆是

非學非無學智等智似解能伏見惑因此似解能發苦忍真明故云隣聖曰賢今解賢者名直善也一切天魔眷屬及諸凡夫皆以愛著之心修善一切外道皆以邪見之心修善此等雖復修善虛僞邪曲不名爲直今佛弟子七種行人皆明識生滅四諦之理知愛論見論皆是邪曲伏此愛見邪曲之心用正直之心修諸善法故名直善也復次一切愛論所詮皆有生滅四諦之理天魔眷屬及諸凡夫所不能見是故流轉生死猶若循環又一切見論所詮皆有生滅四諦之理六師外道悉不能見是故生死流轉猶若循環故涅槃云我昔與汝等不見四真諦是故久流轉生死大苦海今佛法七種行人從聞生解明識此二種生滅四諦故得信心正直以此直

心修諸善法即是直善故通名爲賢也問曰云何名爲屬愛生滅四諦之理答曰行人一期果報即是屬愛之果具有三苦故名爲苦若理審實不虛名之爲諦若於此之苦果無明不了愛著此果起諸惡業能招聚三途劇苦之報又愛著此果起諸善業能招聚修羅人天生死之報此二結業能招六道二十五有生死苦報通名爲集集理審實不虛名之爲諦若能觀此報身修戒定慧四念處三十七品通至涅槃名之爲道道理審實名之爲諦屬愛煩惱善不善業三界二十五有因滅名子縛滅捨此報身永更不受三界二十五有苦果名果縛滅此二種滅名之爲滅滅理審實名之爲諦問曰云何爲屬見生滅四諦之理答曰衆生一期報身具有三苦名之爲

第六

五

苦若理審實不虛目之爲諦迷此報身起身邊二見四見六十二見即是無明愛取因此若起惡業則能招聚三途苦報又因此若起善業則能招聚修羅人天生死之果此二種結業能招聚六道三界二十五有生死苦果故通名集集理審實目之爲諦若能觀此諸見汙穢善不善五陰修戒定慧四念處三十七品則能通至涅槃名之爲道道理審實名之爲諦若身邊二見滅則一切八十八使煩惱業滅得須陀洹果超果之人三界思惟十使滅則九十八使業煩惱滅是則三界二十五有因滅名子縛滅捨此等報畢竟不生三界二十五有名果縛滅此二種滅名之爲滅滅理審實名之爲諦今明此諸見四諦並長爪所迷末代講說橫說四諦名義實爲委悉

豎而明之未必深見此意故以邪為正以正為邪以淺為深以深為淺世出世法混濫無分聽講坐禪若明識此意即於佛法得正信分明歸依三寶道心自然而發專求離苦涅槃終不染著文字語言無益諍論貪世名利眷屬果報也此之七賢三是外凡名乾慧地四是內凡即是性地若外凡已前未能歸心三寶豈識愛見四諦修五停心耶皆名為邪定聚眾生也若乾慧地名不定聚眾生若性地名正定聚眾生也一明初賢五停心觀者

一阿那般那觀<sup>六</sup>二不淨觀三慈心觀<sup>六</sup>四因緣觀五界方便觀此五通言停心者停以停止為義亦名五度門觀若人歸依三寶受佛戒法名佛四眾弟子若聞生滅四諦之教因此發聲聞心欲觀四諦離生死苦求涅槃樂但

以五種煩惱散動不定如風中燈當修五種觀法五種觀法者一數息觀二不淨觀三慈心觀四因緣觀五界方便觀問曰何不依數人說不淨觀為先答曰今依禪門辯次第也以病先後隨人不須定執前後次第也問曰此五觀門為對五人為對一人答曰橫對五人豎為一人一人隨病多少對不定也此五種觀法對治五不善法即有五意一對治二轉治三不轉治四兼治五亦對亦轉亦不轉亦兼治一對治者若覺觀多者對治數息二貪欲多者對治不淨三瞋恚多者對治修慈四愚癡多者對治修因緣觀五著我多者對治修界方便觀若行者覺觀等分煩惱偏重攀緣不住當修數息隨觀息對治相應則三種覺觀煩惱止息心不動散發諸禪定定法

持心入出安隱故名停心也所以者何修安般念有三種一名始習行二名已習行三名思惟已度一數即是始習二隨即已習行三觀即已度復次數隨觀皆名始習得三種欲界未到地定名已習行發諸初禪名已度餘不淨觀等四停心法亦當如是分別心既調停心乃可習觀猶如密室之燈入道根本無過此五法也若心不住或須轉治不轉治等及發諸禪功德具如次第禪門內方便明也若行人隨成一觀心得停住即入初賢位問曰此處何故不說念佛三昧爲五種耶答曰開因緣觀出界方便代也界方便與小乘念諸佛相同亦破境界逼迫障也有人言若作五度門無念佛名若作六度門即明念佛度治等分障道也問曰若以數息不淨等心得

停住爲初賢者今世人修數息不淨等觀非但心住乃發種種禪門境界是初賢位不答曰若以愛見之心修禪乃至非想尚非初賢何況數息不淨等心得停住乃發淺近諸禪而名賢耶所以者何如經所說多修福德禪定不修智慧名之爲愚多修智慧不修福德禪定名之爲狂豈可說狂愚之人爲初賢也今明賢者本是直善人耳問曰何等名直善人相答曰此應四義簡別一者若人隨愛見破戒此非直非善故非賢人如無目無足之人不能到清涼池也二者持戒禪定而生邪見此善而不直亦不名賢如有足無目亦不能到清涼池也三者信心正見而破戒心亂此直而不善亦不名賢如有目而無足亦不能到清涼池也四者若人信解真正得佛教

意持戒清淨修阿那般那不淨觀等得心停住乃名直善初賢之位如人目足備故入清涼池也問曰云何名爲信解真正得佛教意分明之相答曰如中論說佛去世後後五百歲像法之中人根轉鈍深著諸法求十二因緣五陰十二入十八界等決定相不知佛意但著文字今謂不知佛意者佛知生生不可說有因緣故亦可得說也佛說正因緣生滅教門計緣化物者意欲令衆生離生死苦得涅槃樂也若著文字分別諍競則爲三界火宅所燒此不得佛意也今明欲知佛意者若知三藏教門十意分明必定離生死苦得涅槃樂也十意者即是十法名目具如前三觀中辯今略就此三藏教門解釋一信解因緣法者即是知不可說無明因緣出生一切法

破外人說無因緣生一切法破外人說邪因緣生一切法種種顛倒妄計之邪僻也二真正發心者驚覺無常之火燒諸世間一心樂求涅槃不念世間名聞利養如羣在獵圍欲跳出也三巧修止觀出世之行者如人乘馬亦愛亦策也四破諸法徧者觀因緣生滅破一切愛見戲論諸法徧也五善知通塞者知一切愛見之法皆有道滅之理名之爲通悉有苦集名爲塞也六善修三十七品調適者於諸愛見不動而修性四念處乃至八正道也七善修助道法者即是修五停心入十二門禪九想八念背捨除八共念處等諸對治助道觀法也八善知位次者善識七賢之位心不叨濫破增上慢成慚愧有羞僧也九安忍成就者能忍內外強軟二賊三障四魔也

十順道法愛不生者發外凡內凡種種順道善法心不愛著也末世求聲聞乘行人知此十法信解分明不著一切文字戲論爲求實慧修五停心入初賢位即是善知佛教意也二明別相四念處位者即爲七意一明念處是佛法入道要門二略釋念處名三分別三種念處不同四明爲破三種六師五明爲成三種羅漢六明念處觀法七正明念處位一明念處是佛法入道要門者如佛在雙樹間將般涅槃阿難請問佛去世後諸比丘依何而住依何修道佛答阿難若我在世及滅度後諸比丘依波羅提木叉住念處修道當知五停心觀成得入初賢即是依尸羅清淨名攝根之戒也是故數人說欲界定爲十善相應心若依未到地發初禪即是定共戒也佛

法雖有種種法門而佛遺言但囑依念處以修道也若離念處雖復布施持戒忍辱精進誦經行道頭陀坐禪聽誦多聞講說教化皆不得入正道故佛勸令依念處修道也二略釋四念處名者四念處亦名四意止即是觀五陰十二入十八界一切諸法中各觀身受心法真實智慧真實智慧者破四倒四食四識四住四魔之智慧也一身念處二受念處三心念處四法念處一身念處者一切內外色陰名之爲身觀身智慧名之爲念明見不淨破淨顛倒名之爲處是爲身念處二受念處者一切內外受陰名之爲受觀受智慧名之爲念知受悉苦破樂顛倒名之爲處是名受念處三心念處者一切內外識陰名之爲心觀心智慧名之爲念見心無常破常顛倒

名之爲處是名心念處四法念處者一切內外想行二陰及無爲法名之爲法觀法智慧名之爲念見法無我破我顛倒名爲處是爲法念處是四念處有十二種觀所謂內四外四內外四也問曰四念處是慧云何反從念受名耶答曰爲初學用念持慧不妄受異緣念爲增上從念受名也三明分別三種念處不同者一自性念處二共念處三緣念處所言自性念處者說不顛倒慧也如佛說修身觀身觀者是慧念處者所作事不妄受緣故除自性過故說念處南嶽師云亦名慧行亦名實觀緣理斷結之正要也所言共念處者與慧相共法如佛說此比丘善法積聚謂四念處是爲正說也南嶽師云亦名行行亦名得解觀是對治事中善法共正道斷結色及

伊六

十二

諸數也又能發諸禪神通也所言緣念處者一切法如佛所說比丘一切法四念處是爲正攝受具足故及略緣故南嶽師云還是性共二種念處能觀之智所觀之境合辯具一切法義也若能分別觀察即發四無礙辯也問曰如雜心說共念處斷煩惱非餘自性念處雖有略境界彼不具足不能斷結也答曰衆生根有利鈍根結厚彼不具足不能斷結利根結薄雖不具助道性念處慧即能斷結復次如雜心明四念處法念處斷結非前三念處今明如禪經說摩訶迦絺那修身念處觀成即得初果何必定至法念處也問曰性念處但說慧數羸弱云何能斷結答曰慧數不獨起豈不能斷結也問曰若諸數隨起即是共義答曰諸數隨起有三種一但是緣

理之慧諸數任運隨起此說性念處二修諸數作助道善法故說共念處斷結故佛說善法積聚屬共念處助正道共斷結使故雜心偏說共念斷結然利根人用性念處非不斷結也四明為破三種六師故佛說四念處教

出過三種六師之說故能破一切外道也若三乘行人修三種念處得成就者亦能破一切外人也何等名為三種六師外道一者一切智六師二者神通六師三者耆陀六師一切智六師者邪心見理發於邪智辯才無礙也神通六師者得世間禪定發五神通亦有十二慈悲忍力刀割香塗心無憎愛皆是根本十二門禪之力用也耆陀六師者即是博學多聞通四韋陀十八大經世間吉凶天文地理醫方卜相無所不知故名耆陀六師也若此

六師內有邪一切智慧外能神通轉變知世吉凶通四耆陀及十八大經無不知曉是則各有智德神解十六大國敬之如佛為欲破此三種六師故說此三種四念處也一者性念處破一切智六師所以者何外人皆依身邊二見發一切智謂得涅槃常樂我淨此則如蟲食木偶得成字蟲亦不知是字非字也今佛說性念處觀破此身邊二見不生四見六十二見顛倒是故破一切智六師也次明共念處破神通六師者外人但於根本四禪發五神通定既淺近兼無不淨觀故神力轉變蓋不足言今佛說共念處即能發背捨勝處一切處九次第定師子奮迅超越三昧發諸神通禪定既深觀行力大所發神通無礙自在變化無方摧諸外道事如反掌是以身

子降伏勞度差目連化河溺諸外道皆是共  
念處觀所成神通也次緣念處觀破常陀外  
道者四常陀十八大經皆明世間人天愛論  
見論淺近之論佛說出世三藏若名與義而  
彼經書所不記載佛說緣念處觀緣佛所說

伊六

十三

三藏教門出世名義法門道理相對比並豈  
是外人之所聞見故緣念處觀破常陀外道  
也五明三種念處成三種羅漢者一若單修  
性念處成慧解脫羅漢二共念處成是俱解  
脫羅漢三緣念處成無疑解脫羅漢所以者  
何性念處即是緣理之智慧念處相應發真  
無漏即成慧解脫羅漢也共念處共善五陰  
成就背捨乃至超越三昧願智頂禪如此助  
道共正道合發真無漏即得三明六通具八  
解脫成俱解脫阿羅漢也若緣念處即緣佛

言教所詮一切陰入界性共二種念處能觀  
所觀名義若在禪定觀此名義即發四無礙  
辯名爲無疑解脫大羅漢也問曰慧俱之名  
乃是曇無得部非數家所用也答曰三藏教  
同俱用無咎復次雜心偈云慧解脫當知不  
得滅盡定若得滅盡定當知俱解脫此偈明  
時不時有慧俱不同也問曰不應別說無疑  
解脫九種羅漢無此名目答曰此出智度論  
明欲結集法藏集千羅漢皆得共解脫無疑  
解脫也如辟支佛出無佛世雖得緣覺道具  
三明八解脫六通變化作佛以不聞佛說法  
故不得四無礙辯若欲報信施之恩但現十  
八變化何況羅漢不聞佛說三藏教而能自  
發四辯無礙解釋佛法無疑滯耶六明念處  
觀法者念處觀法有三種一性念處者大智

伊六

七四

論云性念處是智慧性觀身智慧是身念處  
受心法亦如是解者不同有但取慧數為智  
慧性即是性念處若南嶽師解觀五陰理性  
名性念處故雜心偈云是身不淨相真實性  
常定諸受及心法亦復如是說觀別相性念

處破四顛倒有二種一破愛二破見一破緣  
愛性念處者夫有生之類無不愛著果報五  
陰及外依報也一身念處觀者觀此內身有  
五種不淨一生處不淨二種子不淨三自相  
不淨四自性不淨五究竟不淨一觀生處不  
淨者女人腹中生熟二臟之間十月住也二  
種子不淨者攬抔精血合為種子也三自相  
不淨者身諸垢膩九孔流溢也四自性不淨  
者觀身不淨如明眼人開倉見穀粟三十六  
物不淨充滿也五究竟不淨者此身若死降

脹爛壞蟲膿惡露甚可厭患若見五種不淨  
破淨顛倒名內身念處觀外身內外身亦如  
是二受念處觀內有六根外有六塵根塵合  
故生六識六識生三受苦受樂受不苦不樂  
受觀受苦受是苦苦相觀樂受是壞苦相觀不

苦不樂受是行苦相若意根生三受皆苦即  
破樂顛倒名內受念處外受內外受亦如是  
三心念處觀此意識是有為屬因緣故無常  
先無今有今有後無剎那念念生滅故無常  
即破常顛倒名內心念處外心內外心亦如

伊六

十五

是四法念處觀內想行二陰因緣和合無有  
自性起唯法起滅唯法滅無人無我眾生壽  
命十六知見皆不可得破我顛倒名內法念  
處外法內外法亦如是此如成實大智論明  
是為性念處之初也二破見性念處者即是

觀身邊二見穢汙無記五陰即陰我離陰我陰中有我我中有陰檢我不可得破二十種身見名空聖行次別觀邊見五陰所言性身念處者即是色性色若麤若細悉是不淨麤色即是人身世界細色極於隣虛若見麤細色常是見依色若見麤細色無常亦常亦無常非常非無常是見悉依色常即有見無常即無見亦常亦無常即亦有亦無見非常非無常即是非有非無見如是等四見悉依色即是四邊見若不知是邊見色陰生解執著戲論諍競從見起諸煩惱結使因使作諸惡業或因使起諸善業結業流轉三界二十五有生死無際也云何名為不知邊見色陰之相若是外人盲冥故自不識邊見汙穢之色各云是事實餘妄語計為涅槃常樂我淨此

不足及言但末世佛法學問坐禪之人亦多迷此邊見之色所以者何如毗曇師言毗曇是見有得道析色至隣虛細塵不可破盡見此細塵有理即得道也今謂此猶是邊見有見汙穢之色若因有見生解起諸結業流轉生死事同前說何關道也故智度論云若不<sup>十六</sup>得般若方便入阿毗曇即墮有中又諸成論師皆云見隣虛細色有者此是調心之觀不能得道若析此隣虛細塵空得實法空以見空故即能得道也今謂若見隣虛色空祇是空見邊見汙穢色陰若見此生解起諸結業流轉生死事同前說何關道也故智度論云不得般若方便若入空門即墮無中毘勒說見有隣虛色亦有亦無入道過同前說論既不來此土無論可弘無繁具出但智論云若

不得般若方便即墮有無中也但曉諸三論師或云道非有無那忽毗曇見隣虛細色之有得道也成論復那忽云見隣虛細色空得道也今問若爾見非空非有是得道不若言得道中論何故云若言非有非無名愚癡論此是非有非無邊見汙穢之色何關道也答曰用非有非無破有無有無既破豈有非有非無之可存正道畢竟清淨無說無示也問曰若爾與長爪及老氏明不可說何殊答今一家明性身念處不爾若不見非有非無汙穢色陰四諦之理名愚癡論若知此是汙穢之色名性身念處開三念處門四念處開三十七品門因三十七品見生滅四諦得寂滅涅槃即是見有得道是名於諸見不動而修三十七品若知非有非無汙穢之色如幻如

伊六

十七

化畢竟不可得本自不生即是摩訶衍明身念處具足一切佛法如大智論說也此經云於諸見不動而修行三十七品是為晏坐復何須捨非有非無以盡淨不可說為道也故思益經云譬如有人欲捨虛空終不離空又欲遠覓虛空終不得空若不見非有非無中半滿之道亦不知盡淨不可說中半滿之道雖復慧解分明終是世智辯聰不免結業流轉生死同前所說若知身邊二見四見六十二皆是汙穢色陰即是觀色不淨破淨顛倒名身念處也二受念處若觀受是常是見依受受無常亦常亦無常非常非無常是四見悉依受即是四邊見受陰一受各有三受三受皆苦破樂顛倒是名受念處觀三心念處若觀心是常是見依識心無常亦常亦無常

非常非無常是見悉依識即是四邊見識陰  
四種見識皆是無常破常顛倒是名心念處  
也四法念處若觀想行二陰想行常是見依  
想行無常亦常亦無常非常非無常是見悉  
依想行即是四邊見想行二陰四種見想行

二陰皆無我破我顛倒是名法念處觀此性  
四念處觀觀果報五陰身邊二見單複具足  
乃至不可說汗穢無記五陰若破四顛倒即  
破十四難伏六十二見八十八使及因見所  
起一切善不善二十五有生死之業又此諸

見未必悉是外人所起若佛法中學問坐禪  
發種種知見是非評論皆是身邊二見汗穢  
五陰起如是等諸見戲論破於慧眼不見真  
實若不覺不知不能用性念處觀觀此五陰  
破四顛倒則起見使作諸惡業或用見心修

善即是外道此意難見佛法學問坐禪之人  
當好思之若能覺知用性念處如前觀察破  
四顛倒能生暖法故智論云若有為法中不  
得正憶念能生暖法無有是處有為法中得  
正憶念不生暖法無有是處長爪梵志聰明  
博學為一切法可轉一切論可破無一法可  
得自言得諸法實相尚迷此念處是故如來  
用受正性念處往問即破其愛慢得法眼淨  
當知別相四念處入道之要門若利根人修  
此性念處觀解分明即能發真無漏故佛勸  
諸比丘依念處修道若末世坐禪講說學此  
義即毗曇見有得道其意申也若迷此者設  
言非有非無畢竟不可說皆是愚癡論同上  
說長爪之過意在此也問曰若念處如此玄  
絕經論何意不作是說答曰佛在世時人根

猛利去世之後正像法中猶有得道之人經  
論何須言提其耳側諸其掌也復次西土經  
論悉度來耳

四教義卷第二

第六

十九

音釋

麤止良切 獵力涉切 僻匹亦切 閱蓋牛  
也切阻 脍匹絳切 脹知亮切  
也切阻 脍匹絳切 脹知亮切

四教義卷第三

伊七

隋天台山修禪寺沙門智顛撰

復次上所引經論之文非佛菩薩意耶次明  
 共念處觀大智論觀身為苦因緣生道若有  
 漏若無漏受心法念處亦如是解者不同有  
 師解云共善五陰諸善心數法合明念處若  
 南嶽師解即是九想背捨勝處諸對治觀門  
 助正道開三解脫故名為共念處故經云亦  
 當念空法修心觀不淨是名諸如來甘露灌  
 頂藥服者心無憂得至涅槃岸此即是共念  
 處之明文也言空法者毗曇有門止觀生空  
 名為空修心觀不淨者即是初背捨不壞內  
 外色相不內外滅色相以是不淨心觀外色  
 是名初背捨從初背捨習不淨觀不淨觀有  
 二種一小不淨觀二大不淨觀破淨顛倒內

無色相入二背捨乃至成就八背捨八勝處  
 十一切處九次第定師子奮迅超越三昧觀  
 欲界入初禪皆見不淨破淨顛倒是名共身  
 念處觀受心法念處亦是也次明緣念處  
 觀者智論云一切色法名之為身十八及一  
 入少分名之為身六種受為受六識為心想  
 行二陰及三無為名法解者不同有師解通  
 一切所觀境界皆名緣念處觀有言十二因  
 緣境有言慈悲所緣境若南嶽師解緣佛說  
 教所詮一切陰入界四諦事理名義言語音  
 辭因果體用觀達無礙能生四辯於一切法  
 心無所礙成無疑解脫是緣念處觀也七明  
 別相四念處位者有三種根性不同若慧解  
 脫根性別相四念處但修性念處若俱解脫  
 根性修性念處亦修共念處若無疑解脫根

伊七

二

性俱修三種念處成別相念處若能於別相念處中生四種精進名四正勤修四種定名四如意足五種善法生名之爲根善法增長遮諸煩惱名之爲力分別道用名七覺分安隱道中行名八正道若入八正道即能觀四諦成別相四念處也三明總相念處位者有人言共念處即是總相念處今謂不爾應作四句分別一者境別觀亦別二者境別而觀總三者境總而觀別四者觀總境亦總初境界別觀亦別正是別相性四念處位次境別觀總境總觀別此二即是總相四念處之方便四觀總境亦總此觀若成即是總相四念處之位今明境總觀總即是總上所明性念處所觀五陰作一身念處觀此身汙穢不淨及苦無常無我破淨顛倒及三倒也是名總相

性身念處是總身念處觀或總二陰或總三陰或總四陰或總五陰具釋云受心法念處亦如是總相共念處總相緣念處亦如是類之可解是名總相四念處位此位亦有三種根性類別相念處可知若有方便即入總相念處位若無方便即非總位也云何有方便若於總相念處之中具足修總相正勤如意足根力覺道皆如性四念處中說但以總相善法深細爲異耳若安隱八正道中行即能觀四諦是得性法念處故能生於暖法故智論云八正道中行初得善有漏五陰名爲暖法當知有方便者已得三十七品也問曰八正見道七覺修道今何念處位中說耶答曰毗婆沙論云若八正在前七覺在後決定是無漏若七覺在前八正在後通有漏無漏也

此三賢人位並名乾慧地未得善有漏五陰相似理水定水未沾故名爲乾而悉有觀行能伏諸見故名爲慧住持能生善法名之爲地名乾慧地亦名外凡人也四明暖法者是善五陰是智慧性生聖智火故名暖法行者因善方便總相四念處唯緣法念處依六地定瞿沙說暖頂亦依七地初發善有漏五陰等智似解得十六智火之氣分名之爲暖亦四正勤也譬如鑽火暖氣若發即有煙相用念處觀鑽五陰境發智慧暖起正勤煙故名暖法也又如冬冰春陽氣動則有消融之相暖法解發身邊六十二見冰執漸覺消融也涅槃云得暖法人七十三人我弟子有外道則無以佛法有別相總相四念處觀能破一切諸見顛倒故得暖法十八種六師雖各稱

一切智人戲論破慧眼不見於真實故法華云深著虛妄法堅受不可捨我慢自矜高諂曲心不實於千萬億劫不聞佛名字亦不聞正法如是人難度是故舍利弗我爲設方便說諸盡苦道當知外人如此執見罪障深重豈得生暖法也末法多學問坐禪之人不能如是修習念處執著諍競者亦同外人之過尚不能生暖法之善大乘功德終不發也略說暖位竟五明頂法位者亦是善五陰亦智慧性在暖法之上名之爲頂證暖法已用正方便正憶念勤修增進暖法善根依六地定亦依七地若暖法增長次生善根名爲頂法緣四諦十六行得四如意足定見四諦分明如登山頂觀矚四方悉皆明了故名頂法若生法愛即頂墮也六明忍法位者亦是善五

陰亦智慧性於四諦堪忍欲樂名忍法位於頂法位用正方便勤修增進頂法善根依六地定若頂法善根增進即生柔順忍亦緣四諦十六行爾時信等五種善法並得成根以慧根故於四聖諦堪忍欲樂故名忍法忍法

有三品下忍於十六行作法諦觀中忍十番縮觀上忍但觀欲界苦下四行隨觀一行若下中二品忍雖起煩惱惡業而不受三塗報由受人天百千生若上品忍成但有人天七生業在增上一刹那即入世第一法也問曰暖頂亦堪忍何故不名堪忍答曰若通論四善根亦名四忍但忍法不退別受忍名若暖法遇惡因緣退能造五逆謗方等經作一闡提墮無間地獄若頂法遇惡因緣退雖不斷善根猶作五逆等罪也今此忍法智強惑弱

伊七

五

諸惡所不能動以忍力大故一切惡心非數緣滅如師子王餘獸遠避也問曰若暖頂退者云何名性地答曰此人雖造惡墮地獄一入受罪竟終不重入有性地善根故能得聖果是故經云寧為調達不為鬱頭藍弗調達

造三逆罪墮於地獄出生人中得辟支佛諸根猛利過舍利弗也七明世第一法位者於凡夫所得最勝善根名為世間第一法也亦是善有漏五陰亦智慧性上忍一刹那依六地定以生一刹那最勝善根名世間第一法此一刹那具足五力苦下四行隨緣一行一刹那不住故似見道所以者何行人有二種一愛行二見行愛行有二種一我慢二懈怠增見行亦二種謂我及我所著我慢者修無常行入世第一法懈怠增者修苦行入著我

者修無我行入著我所者修空行入彼總相  
念處次第生決分世間善有九品下下中  
下上名暖法中下中中名頂法中上上下下名  
忍法上上名世間第一法若觀陰無常等善  
根名暖法觀三寶功德名頂法觀察聖諦名  
忍法觀苦聖諦次第聖道名世間第一法暖  
法若退法捨若命終捨若度欲界地捨頂法  
亦如是忍法無退法捨餘二捨同上世第一  
法一剎那無捨復次是四善根人皆用性緣  
法念處修道亦是四念異名也即一得一失  
更受勝名之義也毗婆沙解釋世第一法遂  
有數十家異釋不同七賢名義無量豈凡所  
知也問曰七賢之位前淺後深何故偏釋乾  
慧地不委分別性地答曰乾慧地最淺如上  
分別已自難知非世能測正是初心所學邪

正分流一切佛法行人即目急用一切學問  
坐禪之人所迷沒處須略分別也若入性地  
解慧自生非凡能測多言妄說何畢承信所  
以一家講經說法必須委釋初心若賢聖深  
位但點章而已其坐禪者略知佛法大意即  
須覺悟無常懺悔行道豈可馳逐不急之言  
其欲講說利物得此正意分明名相有所不  
達更白尋訪略說七賢位竟二明七聖位者  
一隨信行二隨法行三信解四見得五身證  
六時解脫羅漢七不時解脫羅漢此七位通  
名聖者聖以正為義即練道懸鏡也苦忍真  
明捨凡夫性得入聖人性真智見理斷於同  
類之因故名為聖此七聖人復有二種不同  
謂學無學前五種聖人悉是學人後二種聖  
人是無學位也言學人者始從苦法忍發得

眞智自爾方有聖人也有聖諦具有漏無漏  
二種五陰見聖迹故名爲學人於諦不推求  
故名無學人也又無學人者眞智見理既極  
三界正使已盡無惑可治不須更學四眞智  
也復就七聖之位分爲三道所謂見道修道  
無學道一見道者即是八正道見理斷見諦  
惑至十五心如破石方便也二修道者即是  
七覺分隨觀一諦所斷思惟如斷藕絲方便  
也三無學道者如前分別也一明信行位即  
是鈍根人入見道之名也所言鈍者非自智  
勲憑他生解名爲鈍也是在方便道先雖有  
信以未發眞不名爲行行以進趣爲義從得  
苦忍眞明十五利那進趣見眞名隨信行故  
說但有近行人無遠行人又若在十五心中  
命終無有是處苦法忍者欲界見斷十使對

治是法是則初無漏無礙道也復次世間第  
一法次第不作不向不行以能捨邪業邪趣  
邪見也又復世間第一法分別苦法忍作五  
種定謂地定行定緣定利那定次第緣定次  
第緣定者世間第一法後即入苦忍也雜心  
偈云謂色無色苦集滅道亦然此法無間等  
是說十六心十五心成屬見道第十六心即  
屬修道也若謂不應然者如盡智成亦不應  
屬無學道也是信行人見道十五心亦名八  
人地八忍具足智少一分也即是須陀洹向  
亦名行中須陀洹也二明隨法行位者即是  
利根人入見道之名也言利根者自以智勲  
見理斷結故云利也本在方便道中能自用  
觀智觀四眞諦法但未發眞不名爲行因世  
間第一法發苦忍眞明十五利那進趣見眞

故名法行也分別行類前行解釋可知但鈍根憑他生解智少觀察利根自智多觀察為異耳三明信解位者即是信行人入修道轉名信解也鈍根憑他信進發真解故名信解此信解人證果有三一證須陀洹果二證斯陀含果三證阿那含果一明信解證須陀洹果者第十六道比智相應即證須陀洹果也須陀洹天竺之言此翻修習無漏若成論明猶是見道若數人明義證果即入修道即用此一往釋修習無漏義便也若見使斷略說三結盡廣說八十八使盡名須陀洹受生死七返終不至八生二明信解證斯陀含果即有二種一向二果一向者從初果心後更修十六諦觀七菩提行現前即此世無漏斷煩惱一品無礙斷欲界煩惱一品二品無礙斷

二品乃至五品皆是斯陀含向亦名勝進須陀洹約此說家家也二果者若斷六品盡證欲界第六品解脫即是斯陀含果也斯陀含天竺之言此翻云薄欲界煩惱分為九品前六品盡餘三品在前斷已多其所未斷少故名為薄三明信解人證阿那含亦有二種一向二果一向者若斷欲界七品乃至八品皆是阿那含向亦名勝進斯陀含約此說一種子也二明果者九無礙斷欲界結證第九解脫即名阿那含果也阿那含天竺之言此土翻云不還此人欲界五下分結盡更不還生欲界故言不還也復次須陀洹有三種一行中須陀洹即是須陀洹向二住果正是須陀洹果也三勝進勝進須陀洹亦家家即是斯陀含向也斯陀含但有二種一住果二勝

進勝進斯陀舍亦名一種子即阿那舍向也  
阿那舍亦二種一住果二勝進勝進阿那舍  
進斷五上分結所謂色染無色染等結即阿  
羅漢向也阿羅漢但有一住果問曰此說次  
第得果毗曇明超越得果云何分別答曰若  
凡夫時斷欲界六品乃至八品盡來入見諦  
道後發苦忍真明十五心中是斯陀舍向十  
六心即證斯陀舍果也若凡夫時先斷欲界  
第九品乃至無所有處盡後入見諦十五心  
名阿那舍行第十六心即證阿那舍果此是  
超越人不證前二果也是信解人雖是利根  
而有五種根性不同所謂退思護住勝進也  
若證阿那舍果復有五種般及七種般八種  
般五種般者一中般二生般三行般四不行  
般五上流般也七種般者開中般爲三種也

八種般者五種如前足現般無色般不定般  
也四明見得位者法行人轉入修道名爲見  
得是利根人自以慧勳見法得理故名見得  
是見得人在思惟道次第證三果超越得二  
果亦如信解中分別但以利根不藉聞法不  
假眾具自能見法得理爲異也見得利根但  
是不動根性若證阿那舍果亦有五種般及  
七種八種不同也五明身證位者還是信解  
見得二人入思惟道用無漏智斷五下分結  
故發四禪四無色定即用共念處修八背捨  
八勝處十一切處入九次第定三空定事性  
兩鄣先已斷盡又斷非想事鄣滅緣理諸心  
心數法入滅盡定得此定故名身證阿那舍  
也所以者何入滅盡定似涅槃法安置身內  
息三界一切勞務身證想受滅故名身證也

若約初果解身證者但以先於凡夫用等智斷結得四禪四無色定後得見諦第十六心證那含果即修共念處還從欲界修背捨勝處一切處入九次第成身證也是阿那含有二種一者住果但是阿那含也二者帶果行向即是勝進阿那含也猶名那含行向故即是羅漢向攝故智度論云那含有十一種五種阿那含正是阿那含六種阿那含阿羅漢向攝當知此身證阿那含即是勝進阿那含阿羅漢向攝五種般那含七種般那含皆但有上流般八種般那含但有現般無色般也如是阿毗曇約信解見得分別數那含乃至有一萬二千九百六十種廢說大事豈煩分別也六明時解脫羅漢者即是信行鈍根待時及衆緣具方得解脫故名時解脫所言

律

十二

阿羅漢者是天竺語此土無翻名含三義一殺賊二不生三應供也具此三義位居無學羅漢有五種謂隨信行生五種退法思法護法住法必勝進也彼得二智盡智無學智等見也若用金剛三昧於非想第九品惑盡次一剎那證非想第九解脫成盡智次一剎那得無學等見也彼或時退故不說得無生智此五種阿羅漢是信種性根鈍因中修道必假衣食牀具處所說法及人隨順善根增進不能一切時所欲進也是五種羅漢各有二種不得滅盡定但是慧解脫得滅盡定即是俱解脫若不得滅盡定是人因中偏修性念處觀不修共念處觀若得滅盡定者是人因中修性念處觀亦修共念處觀若證果時三明八解一時俱得故名俱解脫也七明不時

解脫阿羅漢者即是法行利根名不動法阿羅漢也所言不時解脫者不動法人一向利根因中用道能一切時中隨所欲進修善業不待眾具故名不時解脫也是人不為煩惱所動故名不動是不退義成就三智故謂盡智無生智無學智等見能用重空三昧擊聖善法以定捨定故言能擊是不動法阿羅漢亦有二種不同一不得滅盡定但名慧解脫二若得滅盡定即是俱解脫若聞佛說三藏教門修緣念處即發四辯名無疑解脫是名伊七波羅蜜聲聞能究竟具足一切阿羅漢功德也問曰是時不時二人利鈍不同云何並得俱解脫也答曰此簡鈍利明得有難易之殊何關簡得與不得耶此之七聖名真沙門沙門有二種一者直言沙門沙門即因也二者

沙門那沙門那者果也沙門有八十九所謂見諦八忍思惟八十一無礙也就沙門那亦有八十九所謂見諦八智思惟八十一解脫也就沙門那復有二種一有為果八十九有為果也二無為果八十九無為果也此約智斷約智德明八十九有為果約斷德明八十九無為果也略說三藏教毗曇有門明七賢七聖位大意竟但賢聖義多有所關毗曇有門雖義無復是過若欲分別究其支派必須讀毗婆沙也問曰前說乾慧之位實與舊解殊途次明性地見思無學此與常人解釋未覺有異答曰若乾慧有異即性地見思無學皆悉異也譬如生人死人若一身分是生一切身分皆悉是生若一身分是死一切身分俱死死生之殊豈非一切俱異今明乾慧若

如生人則性地見思無學皆如生人他明乾  
慧若如死人則性地見思無學皆如死人復  
次今明乾慧若如死人性地見思無學皆如  
死人他明乾慧如生人性地見思無學皆如  
生人當用智斷合譬始終名相如身身分何

便七

十三

曾不同始終智斷如生死之異何得不異其  
得此意者如人有目日光明照見種種色其  
迷此意者如為盲人設燭何益無目者乎此  
應次明三藏教空門入道二十七賢聖位者  
信法二行即是兩賢在方便道空門發真斷

見惑未盡行即須陀洹近向見惑盡名須陀  
洹果空解增明斷欲界思惟一品乃至五品  
名斯陀含向斷六品盡即是斯陀含果斷七  
品八品盡名阿那含向欲界九品下分盡即  
是阿那含果阿那含有十一種帶果行向即

是阿羅漢向進斷上二界思惟也非想九品  
盡即是阿羅漢果是阿羅漢有九種賢人有  
二聖有二十五合有二十七賢聖具出成論  
但事相煩多廢說摩訶衍義毘勒門非空非  
有門經不委出論不來此豈可謬有所判問  
曰兩門不度不可懸判空門明義勝阿毗曇  
何故捨勝用劣答曰毗曇雖劣而是佛法根  
本是故佛去世後流傳利物且又大乘經論  
破小用小多取毗曇有門少用空門故須略  
出毗曇有門佛法根本賢聖之位次也第二  
明三藏教辟支佛乘位者三藏教詮生滅十  
二因緣之理明辟支佛義亦應具有四門今  
但約薩婆多宗明有門辟支佛乘位即為五  
意一翻譯二分別大小三明宿緣四明觀法  
五料簡一翻譯者即為二意一翻名二解釋

伊七

十四

一翻名者辟支迦羅是天竺之言此土翻爲緣覺此人宿世福德神根勝利學十二因緣以悟道也二解釋者大智論云緣覺有二種一獨覺二因緣覺一明獨覺辟支迦羅者若佛不出世佛法已滅是人先世因緣能獨出

智慧不從他聞自以智慧得道故名獨覺如大智論明有一國王出園遊戲清旦見樹林華果鬱茂甚可愛樂時王食已即便偃卧王諸嫫女皆競採華毀折林樹時王覺已見林毀壞內心覺悟一切世間無常變壞皆亦如是思惟是已無漏道心朗然開發斷諸結使成辟支迦羅具六神通即飛到閑靜處山林清曠入深禪定受無爲樂二明因緣覺者是人道根淳熟藉小因緣而能覺悟也如見林壞因此覺悟成辟支佛大智論意似用此爲

因緣覺也今明因緣覺者因聞十二因緣覺悟成辟支佛也十二因緣有三種不同一者三世十二因緣二者二世十二因緣三者一世十二因緣三世破斷常二世破我一世破性也一明三世十二因緣者過去二因現在

五果現在三因未來二果過去二因者謂無明行現在五果謂識名色六入觸受現在三因者謂愛取有未來二果者謂生老死憂悲苦聚是爲三世合明十二因緣是十二因緣有三種道一煩惱道二業道三苦道是三道更互爲因緣從無始已來生死不絕至于今身若不修觀智未來流轉憂悲苦惱無有邊際若修觀智則無明滅乃至老死憂悲苦惱皆悉滅也譬如千年闇室若不置之一燈其室方將永闇若置之一燈則故闇皆滅新闇

不生也若聞此十二因緣發真無漏則無明滅乃至生老死憂悲苦聚皆滅是名因緣覺也二次明二世十二因緣者出大集經佛爲求辟支佛人說也此十二因緣現在有十未來有二有解現在有九未來有三現在十者一無明大集經云何爲觀於無明先觀中陰入父母所生貪愛心愛因緣故四大和合精血二滯合成一滯大如豆子名歌羅邏是歌羅邏愛有三事一命二識三煖過去世中業緣感果無有作者及以受者初息出入是名無明歌羅邏時氣息入出有三種道所謂隨母氣息上下七日一變息入出者名爲壽命是名風道不臭不爛是名爲煖是中心意名之爲識善男子若有欲得辟支佛果者當觀如是十二因緣二行者復觀三受因緣五陰

十二入十八界云何爲觀隨於念心觀息出入觀於內身皮膚肌肉筋骨髓腦如空中雲是身內風亦復如是有風能上有風能下有風能滿有風能焦有風增長是故息之出入名爲身行以出入息從覺觀生故名意行和合出聲名口行也三者識三行因緣則有識生故名爲識四名色者著識因緣則有四陰及以色陰故名名色五六入者五陰因緣識行六處故名六入六觸者眼色相對故名爲觸乃至意法皆亦如是七受者觸因緣故念色至法名之爲受八愛貪著於色十七乃至於法名之爲愛九取受因緣故四方求覓名之爲取十有者取因緣故受於後身故名爲有此下二因緣屬未來也十一生者有因緣故有生是名爲生十二老死生因緣故則老死種

種諸苦是名五陰十二入十八界十二因緣  
之大樹若聞此因緣發真無漏亦名因緣覺  
也備說具出大集經三次明一念十二因緣  
者此但約現在隨一念心起即具足十二因  
緣亦出大集經爲辟支佛人說此因緣也經  
曰因眼見色而生愛心名爲無明爲愛造業  
名之爲行至心專念名識識色共行名爲名  
色六處生貪是爲六入因入求愛名之爲觸  
念色至法名之爲受若心貪著名之爲愛求  
是等法名之爲取此等法生名之爲有次第  
不斷名之爲生次第斷故名之爲死生死因  
緣衆苦逼切名之爲惱乃至意法生貪亦復  
如是是十二因緣一人一念悉皆具足若聞  
此因緣心開意解發無漏慧亦名因緣覺也  
瓔珞經又出十種十二因緣若隨聞一種發

十七

十七

真無漏皆名因緣覺也今不備出故涅槃經  
云譬如老人年百二十不堪付金意在此也  
問曰獨覺亦得悟上來所說諸因緣不答曰  
皆由前生之宿習也問曰若依三種因緣教  
得無漏智即是稟教緣覺名利根聲聞云何  
生聞等三慧耶又問何等爲生得慧何等爲  
方便慧耶少答二明分別大小不同者此二  
種辟支迦羅皆有大小不同今明獨覺辟支  
迦羅具有二種一者本是學人在人間生是  
時無佛佛法已滅或須陀洹七生既滿不受  
八生自悟成道是不名爲佛亦非羅漢名  
曰小辟支迦羅若論其道力或有不如今舍利  
弗等大羅漢也二者大辟支迦羅於二百劫  
中作功德增長智慧得三十二相分或三十  
一相或三十相二十九相乃至一相於九種

阿羅漢中智慧利勝於諸深法總相別相能  
知能入久修習定常樂獨處有如是相名大  
辟支迦羅也皆歷三種十二因緣十種十二  
因緣分別小大也若因緣覺分別小大亦如  
是三明宿緣者今此小大二種獨覺辟支迦  
羅宿植不同或於前世若偏修性念處觀十  
二因緣善根淳熟生無佛世因於遠離自然  
獨覺成小辟支迦羅也若於宿世修性共二  
種念處理事善根淳熟獨覺自悟具足三明  
八解脫及六神通成大辟支迦羅也而其不  
發四無礙辯者禪定是內證習因符慧而發  
名義是外法故雖有宿習而不得發皆約三  
種十二因緣十種十二因緣分別宿習因緣  
也若生佛世聞生滅十二因緣三藏之教即  
發四辯還名羅漢在聲聞衆數猶如迦葉舍

利弗等皆是辟支根性人也亦名辟支佛若  
不爾者那得次爲求辟支佛乘說十二因緣  
此人設不值佛亦自得道故法華經云若人  
有福曾供養佛志求勝法爲說緣覺皆因緣  
覺也根性三種十種宿緣不同可知四明觀  
法者十二因緣有二種一者觀屬愛十二因  
緣二觀屬見十二因緣一觀屬愛十二因緣  
者即爲二意一推尋二觀破一推尋者是人  
聞正因緣生滅之法信解分別覺一切屬愛  
煩惱皆是十二因緣觀因緣入定欲息心達  
本源求自然慧樂獨善寂修習定心得諸禪  
定住此定中知屬愛煩惱即是無明逆順推  
尋即見十二因緣云何逆推此貪愛因何而  
生即知因受受因何生即知因觸如是觸因  
何而生即知因六入六入因名色名色因識

識因於行行因無明過去一切煩惱也復順  
推此愛愛能生取因取則成有業因此有業  
則有未來二十五有之生因生有老死憂悲  
苦聚輪轉無際若因停心觀入深禪定如是  
逆推尋或時見歌羅邏初受生乃至見過去  
身起業煩惱乃至二生百千生也順尋取有  
若因禪定之力或見未來一生二生乃至十  
百千生若見過去未來事其心悲感道心精  
熟轉復增感也二明觀破屬愛十二因緣者  
即是性念處歷別觀十二因緣也性念處觀  
略如前說所以者何若觀愛即汙穢五陰性  
念處若觀受觸六入名色識即是觀果報無  
記五陰性四念處若觀於行即是善不善五  
陰性四念處若觀無明即是過去汙穢煩惱  
五陰性四念處若觀於取即是現在汙穢五

陰性四念處若觀於有即是善不善五陰性  
四念處若觀未來生老死即是報生無記性  
四念處是則用四念處逆順觀察十二因緣  
破四顛倒顛倒若滅即是無明一切煩惱滅  
以無明滅故行滅乃至老死憂悲苦惱滅是  
明性四念處歷別觀屬愛煩惱十二因緣之  
觀也二次明觀破屬見煩惱十二因緣者亦  
為二意一者推尋二者觀破一推尋者若見  
神及世間常無常亦常亦無常非常非無常  
是則現在生身邊四見因此身邊四見生十  
四難六十二見此身邊四見即是四取逆順  
尋此四取逆尋四取四取因四愛四愛因四  
受四受因四觸四觸因四入四入因四名色  
四名色因四識四識因四行四行因四種無  
明復順尋四取四取能生四有此四有即受

一切二十五有生老死憂悲苦惱若因停心觀得深禪定或見過去未來生事具如前說也二明觀破因性四念處觀觀四取身邊四見如是次第乃至無明破過去如去不如去亦如去亦不如去非如去非不如去身邊二見汗穢五陰也又順觀有四取乃至未來生死破有邊無邊亦有邊亦無邊非有邊非無邊身邊二見汗穢五陰若能如是用性四念處破三世身邊二見之四見即破十四難六十二見一切屬見煩惱一時皆滅是名無明滅即行滅乃至老死憂悲苦惱皆滅若屬見煩惱滅即還用前觀愛十二因緣性念處觀破欲愛色愛無色愛皆滅是則三界煩惱業道滅者名爲有餘涅槃若苦道滅者即是無餘涅槃是名用性念處智慧觀十二因緣入

涅槃也性念處觀法略如前說故經云十二因緣其義甚深難解難見意在此也如佛說大涅槃經時有一外道名曰富那問世尊言瞿曇汝云何令我知神及世間常乃至非常非無常佛答言汝若能畢故不造新即能知神及世間常乃至非常非無常梵志即言我已知竟佛問汝云何知梵志答言故名無明新名取有若知無明不起取有即知神及世間者常乃至非常非無常是時梵志求哀出家爲佛弟子也又中論明聲聞經入第一義第七並約觀十二因緣破六十二見入第一義若十二深得此意不止破外道也若佛弟子學問坐禪發種種見取著諍論起諸煩惱二十五有生死之業皆是屬見十二因緣也覺知者能用性念處檢破即得解脫其迷此者十二因

緣流轉生死無有邊際故中論云眞法及說者聽者難得故如是即生死非有邊無邊也共念處緣念處助觀十二因緣類前可知也五明料簡者問曰若宿習自然覺悟者何須佛爲說十二因緣答曰聞說則疾得不說自悟少遲如果熟雖應自墮若須急取薄搖即落問曰辟支佛乘何意不制果答曰聲聞人鈍故制果若辟支佛久習智慧神根利故不須制果譬如二人共行其身羸者須止息處若身強者直到所在故佛但說辟支佛道不立果位也復次總相斷結智慧羸故但除正使名聲聞乘別相觀因緣智慧細故侵除習氣名辟支佛復次聲聞鈍故先觀苦諦緣覺利故先觀集諦也問曰聲聞念處別相爲羸總相爲勝今何故總相爲羸別相爲勝答曰

還用別總歷別細觀十二因緣故別爲勝也復次聲聞功德禪定力淺天眼極遠但見小千國土辟支佛久種善根禪定力深若發天眼乃過三千見他方世界略明三藏教有門緣覺位竟空門如成論分別毘勒門非空非有門論既不度則不可知也

四教義卷第三

音釋

縮所六切 邏魚果切 燭乃管切 髓息委切  
斂也 溫也 中脂也  
焯即消 羸力追切 瘦也

四教義卷第四

伊八

隋天台山修禪寺沙門 智顛撰

第三約三藏教明菩薩位者三藏教詮因緣生滅之理明菩薩藏亦應具有四門今約毗曇有門明大乘菩薩位即有四意一翻譯二釋位三料簡四釋淨無垢稱義第一翻譯所言菩薩摩訶薩者是天竺語若具依彼言應云菩提薩埵摩訶薩埵但諸師翻譯不同今不具述而智度論翻云菩提名佛道薩埵名成衆生摩訶言大此人用諸佛大道成衆生也又師翻云菩提名道薩埵名心摩訶名大是爲大道心而諸經多云菩薩摩訶薩者什師以天竺語煩兩句八字標名故除三字留五字合爲一句名菩薩摩訶薩也但三乘菩提通名爲道而菩薩獨受大名者以其緣四

諦起慈悲四弘誓願上求佛果下化衆生此心曠大故別受摩訶薩埵之稱也第二釋菩薩位略爲七意一發菩提心二行菩薩道三種三十二相業四六度成滿五一生補處六生兜率天七八相成道一發菩提心者如釋迦牟尼菩薩於過去世爲陶師值釋迦牟尼佛供養彼佛又見彼佛智慧第一弟子名舍利弗神足第一弟子名目捷連多聞侍者名曰阿難爾時陶師供養佛已即便發菩提心作是誓願願未來世我得作佛還名釋迦牟尼智慧弟子名舍利弗神足弟子名目捷連多聞侍者還名阿難佛可其願從是初發菩提心即慈悲四弘誓願發也但三藏教慈悲四弘誓願皆緣生滅四諦而起所言慈悲心者一大慈心欲與愛見二種衆生道滅之樂

伊八

二

也二大悲心欲拔愛見二種衆生苦集之苦也四弘誓者一未度者今度即是度天魔外道愛見二種六道衆生未度三界火宅之苦諦今得度也二未解者今解即是愛見二種衆生未解愛見二十五有業令得解也三未安者今安即是愛見二種衆生未安三十七品一切諸道今安道諦也四未涅槃者今得涅槃即是愛見二種衆生未滅二十五有生死因果皆令得滅諦涅槃也若緣愛見二種衆生生滅緣四諦而起慈悲四弘誓願者即是菩薩初發菩提心也知愛見四諦故智慧勝諸天魔一切外道有慈悲誓願功德故勝一切聲聞緣覺故大智度論云初發心以爲天人師勝出一切聲聞及一切也二行菩薩道者即是三阿僧祇劫行六度也從過去釋

迦牟尼至闍那尸棄佛時名一阿僧祇劫從此常離女人身爾時不自知我當作佛不作佛此初阿僧祇劫即是得五停心別相總相念處之位用性念處共念處緣念處行六度也三種念處義略如前說所以者何脩性念處爲壞屬愛魔業破屬見一切智六師修共念處欲壞愛結破神通六師修緣念處爲一切愛見衆生說法屬愛壞故一切天魔眷屬壞見壞故三六十八種六師及一切外道眷屬壞也故用三種念處行六波羅蜜意欲降伏天魔制諸外道菩薩用三種念處行六度時雖修性念處而不斷結爲生三界度衆生故常欲多修共念處觀爲得神通成四攝法同事調伏愛見衆生又常多修緣念處觀爲欲成四辯說三乘法化一切愛見衆生共出

三界火宅也是初阿僧祇劫修行六度用四弘誓願安撫生死衆生心無怯弱故壞女人之業常受丈夫之身也爾時未發暖解位在外凡故不自知已身當作佛不作佛次明罽那尸棄佛至然燈佛爲二阿僧祇劫是時菩薩用七莖青蓮華供養然燈佛敷鹿皮衣布髮掩泥時然燈佛便授其記汝當來世必得作佛名釋迦牟尼爾時菩薩雖能自知我必作佛口不稱我當作佛謂此是用暖法智慧修六度也所以者何因總相四念處初得善有漏五陰即是性地順忍初心之位既有證法之信故必知作佛而用暖解法修行六度心未分明故不向他說次從然燈佛至毗婆尸佛爲第三阿僧祇劫滿是時菩薩內心了了自知作佛口自發言無所畏難我於來世

當得作佛今謂此是頂法之位行六度四諦觀解分明如登山頂四顧分明了了自知作佛亦向他人說也三明過三阿僧祇劫種三十二相業者今謂此是入下忍之位用此忍智修行六度成百福德用百福德成一相以爲三十二相之業因也種三十二相業因於下忍之位修六波羅蜜成百福之相以爲三十二相業因也是三十二相於欲界閻浮提人中受男子身佛出世時緣佛身相故得種也問曰所言百福得成一相者幾功德成一福德耶答曰異解不同難可定判有人言是福不可稱量不可譬喻是菩薩入三阿僧祇劫心修大行種是三十二相因緣以是故福無能量唯佛能知問曰菩薩幾時種三十二相答曰極遲百劫極疾九十一劫弗沙佛觀

釋迦菩薩自生弟子熟彌勒菩薩自熟弟子  
生多人難度一人易化故弗沙佛於寶窟中  
放光照釋迦釋迦菩薩尋光至弗沙佛所於  
七日七夜一心觀佛目不暫瞬但用一偈稱  
歎云天地此界多聞室逝宮天處十方無丈  
夫牛王大沙門尋地山林徧無等以苦行力  
故超越九劫在彌勒前成正覺也四明六波  
羅蜜滿者問曰檀波羅蜜云何滿答曰一切  
能施無所遮礙乃至以身施時心無所惜如  
尸毗王以身施鴿解剔皮肉雖受痛苦舉身  
上秤以贖鴿命心不悔恨立誓自證我心無  
悔者身可平復既立誓已地震動身還如  
故如是等菩薩本生捨身命施心不退悔是  
檀波羅蜜滿也問曰尸波羅蜜云何滿答曰  
不惜身命護持淨戒如須陀摩王是王精進

伊八

五

持戒常依實語與劫磨沙陀大王共期乞駕  
還國七日供養沙門竟即來就終是王期滿  
爲持實語戒故赴期就死是則爲持一戒不  
惜身命如是等處處因緣經說本生菩薩因  
地持戒捨身心無悔恨即是尸波羅蜜滿相  
問曰羸提波羅蜜云何滿答曰若人來罵過  
捶割剝支解奪命心不起瞋如羸提比丘常  
修慈忍在林樹下入禪三昧時迦梨尸王爲  
女色故生重弊妬截其手足耳鼻心忍不動  
時王問言今截解汝身定能忍不比丘答言  
實不瞋恨王言誰信汝那比丘答言我若實  
忍心不瞋恨當令我身即尋平復說是語時  
身即如故如是等不惜身命修行忍辱是名  
羸提波羅蜜滿相問曰毗梨耶波羅蜜云何  
滿答曰若有大心如大施太子爲一切衆生

入海採寶從龍王得如意珠欲將還閻浮提  
雨衣服寶物布施衆生海神惜珠因其睡卧  
即盜取其珠將還海宮太子覺已爲此珠故  
誓以此身扞大海水令海乾盡從神索珠心  
定不懈帝釋天感太子心爲物精勤不惜身  
命即將諸天助扞海水水遂減半海神怖故  
慚愧還珠亦如釋迦菩薩值弗沙佛七日七  
夜翹一足目不暫眴如是等不惜身命爲物  
精進即名毗梨耶波羅蜜滿相問曰云何名  
禪波羅蜜滿伊八相答曰如一切禪定自在又如  
尚闍黎仙人坐禪時無出入息鳥於螺髻中  
生子不動不搖乃至鳥子飛去是名禪波羅  
蜜滿相問曰般若波羅蜜云何滿答曰菩薩  
大心分別如劬孃婆羅門大臣分閻浮大地  
作七分若干大城小城聚落村民盡作七分

般若波羅蜜亦如是是菩薩般若波羅蜜滿  
相今謂此皆下忍智慧能調伏諸根滿足六  
度也所以者何下忍智慧力强煩惱力弱用  
此智慧修行六度能忍六蔽不惜身命成六  
度也四波羅蜜滿正是性念處力至下忍也  
禪波羅蜜滿多是共念處力至下忍也般若  
波羅蜜滿正是緣念處力至下忍也問曰羅  
漢尚不能不惜身命修行六度下忍智慧之  
力何能成六度耶答曰若無慈悲誓願積劫  
修行之力羅漢智慧尚不能爾何況下忍今  
外緣慈悲誓願名植熏修內有忍法智慧助  
破六蔽之力也五住一生補處即是釋迦菩  
薩生在迦葉佛所爲補處弟子淨持禁戒行  
諸功德迦葉授記次當作佛恐此在中忍之  
位也六生兜率陀天者捨閻浮之報上生此

天爲諸天師在於此天用三種念處修八勝處爲欲伏結清淨下閻浮提神通變化降伏天魔四辯說法破諸外道及一切衆生也此猶屬中忍之位問曰菩薩何意從初發心伏結至此伏而不斷耶答曰若斷結即不得受<sup>佛八</sup>生化物觀無常伏結令諸煩惱脂消用清淨心修行六度令諸功德肌長也七下生成道者即是三藏教明八相成菩提果也所言八相成道者一從兜率天下二託胎三出生四出家五降魔六成道七轉法輪八入涅槃一兜率天下者菩薩將欲下生時用四種觀人間一觀時即是人壽百歲是佛出世之時二觀土地諸佛常依中國生迦維羅衛即是百億日月之中也三觀種姓生二種姓中一刹利姓勢力大故二婆羅門姓智慧大故釋迦

牟尼佛生刹利姓也四觀生處何等母人能懷那羅延力菩薩唯中國迦毗羅婆淨飯王后能懷後身菩薩如是思惟已後兜率天下問何故作白象形非餘二明處胎即是正慧入母胎一切衆生邪慧入母胎菩薩憶念不失故各正慧入母胎中陰住則知中陰入胎時知入胎歌羅邏時知歌羅邏七日赤白精血合安浮陀時二七如蠶狀伽陀時三七日如凝酪五胞時出生時皆憶念不失是各正慧入母胎復次餘人住中陰欲受生時於父母所生顛倒心生不淨心菩薩不爾正慧明識父母相續入胎是各正慧也三明出胎相者是菩薩滿足十月正慧不失念從右腋而出胎生墮於地即行七步口自發言天上天下唯我爲尊當初生時國內即有三十二瑞

事在瑞應經具明乃至將示相師阿夷相太子身具三十二相八十種好即便悲淚王恐不祥問阿夷曰我子不祥故悲淚耶仙人答曰吉無不利太子相好分明其若在家當作轉輪聖王飛行皇帝王四天下十善化世其若出家必成自然之佛度脫萬姓但太子相好分明必不在家作轉輪聖王其若出家必得菩提度脫天人傷吾年老不覩佛興故悲淚耳所以用三十二相八十種好莊嚴其身欲爲得三菩提之品器也問何故現相三十二好有八十答成佛莊嚴法如此故四明出家者是時菩薩年漸長大出四城門見老病死苦狀怖心生夜半踰城出家六年苦行食難陀婆羅門石蜜乳糜益身十六功德五明降魔相者即於菩提樹下破萬八千億鬼兵

魔衆魔王敗勳鬼兵退散六成道相者魔衆散已攝心端坐於第四禪住中忍修觀成中忍一刹那上忍一刹那世第一法一刹那發真無漏三十四心得阿耨多羅三藐三菩提三十四心者八忍八智九無礙九解脫也具足佛十力四無所畏十八不共法三達無礙三意止大慈大悲四無礙智一切諸法總相別相悉知故名爲佛第九解脫具足一切種智並在未來故名小乘佛七明轉法輪相者於鹿野苑爲拘隣五人三轉生滅四諦法輪伊八天人得道此爲證三寶於是現世間次說十九二因緣法輪次爲菩薩說六波羅蜜法輪是則開三乘之教名修多羅藏十二年後佛在毗舍離國爲須隣那迦陀長者子作姪欲以是因緣結初大罪二百五十戒次佛在舍婆

提城告諸比丘諸有五怖五罪五怨不除不滅是因緣故作此世未來受無量苦是名佛自說毗曇教從此轉三藏法輪乃至涅槃教三乘弟子是名轉法輪也八明入涅槃相者於拘尸那城娑羅雙樹間逆順出入超越三昧於第四禪中入火光三昧燒身滅度唯留舍利爲人天福田身智俱滅入無餘涅槃是爲聲聞經中說大乘之位也次第三明料簡者問曰聲聞經開三乘何故二乘即生斷結菩薩從初發心乃至降魔都不斷結答曰聲聞緣覺獸患生死自求涅槃不爲利物是故貪取真斷結盡則不受生入涅槃也菩薩大慈憐愍欲度一切受生死苦教化衆生衆生出世善根淳熟即便成道說三乘教共三乘人同入涅槃若因中斷結即不得受生豈能

利物是故忍受生死不斷結使三阿僧祇處在生死教化衆生共出三界不斷結使意在此也問曰菩薩斷結誓願神通應化利物何必須留結而受生耶答曰斷結誓願神通應化受生此乃是摩訶衍之所說非三藏之所明也所以者何斷結誓願受生通教之所說法性身神通受生別教之所說法身應生圓教所說也問曰聲聞經何意不得論斷結受生答曰三藏之教正化小乘傍化菩薩若說菩薩結盡受生二乘即疑若結盡而得受生者諸聲聞人得羅漢果將不更受生耶是故不說菩薩斷結受生也問曰若爲二乘疑不說菩薩斷結受生者大乘方等摩訶般若通教三乘亦應不說菩薩斷結用誓願神通受生也答曰此是生酥熟酥之教二乘漸淳熟

信解分明聞菩薩專心不疑惑故法華云過此已後心相體信入出無難然其所止故在本處問曰所明聲聞經菩薩義爲是佛說爲佛去世後諸聲聞弟子說耶答曰有是佛說亦有是諸羅漢作毗婆沙阿毗曇中說也問曰何者是佛說何者是羅漢說耶答曰如說菩薩從初發心乃至不斷結使坐道場時正習俱斷此是佛說何以得知龍樹論主答數人言若後身菩薩不斷結者是佛方便所說也亦有是諸羅漢佛去世後說者如言初阿僧祇不自知作佛二阿僧祇自知作佛而口不宜說三阿僧祇了了自知作佛亦發言向他說此義非佛三藏中所說乃是羅漢作毗婆沙釋菩薩義也問曰若佛自說三藏教明菩薩義此則可信若諸羅漢所說云何

伊八

十一

可信答曰諸羅漢既是聖人共採佛三藏教意明菩薩義何容全失問曰若爾智度論何意從始至終一一彈破答曰龍樹爲欲申摩訶衍明菩薩所行之道以大破小皆可破也若就小乘明三藏宗途羅漢聖人之所撰集何容頓乖僻也若諸羅漢明聲聞經所釋菩薩義遂併乖僻末世凡人法師何可謬有申釋凡情解釋小乘既不可承用大乘深經豈可出在妄情而論故知雖非佛說若是羅漢作論亦須信受也第二約通教辯位以釋淨無垢義者通教既詮因緣即空之理三乘同稟契理證道必有淺深故須判位通教入道亦具四門四門者一實門二不實門三亦實亦不實門四非實非不實門此四門入諸法實相出智度論中論雖不作門名四句既能

通行人入第一義今立門名觀其義意今謂於理無失至下辯體當略釋今判三乘同入第一義智斷之階級此通教具有四門入道而經論多用空門若論逗機化物隨緣而說四門豈可偏用經論義便事須如此是故今約通教明三乘位正就空門以辯也就此即爲五意一略明半滿判位有同不同二約通教開三乘三正辯通教三乘次位四料簡五正約位釋淨無垢稱義一略明半滿判位不同者若三藏半字教門明位大同小異如毗曇成實釋三藏教辯賢聖位雖復小異而大意是同不足疑也若摩訶衍滿字教門通論祇是一摩訶衍教若細尋義理即有三教明位高下不同其不達大乘方便實可疑也故大品經云有菩薩從初發心即與薩婆若相

應此恐約通教明入位亦是法華經小樹增長之譬也又大品經云有菩薩從初發心即遊戲神通淨佛國土成就衆生此恐約別教以明入位即是法華經大樹增長之譬也又大品經云有菩薩從初發心即坐道場度衆生當知是菩薩爲如佛此恐約圓教明入位亦是法華經一地所生之譬也故大智度論釋燈炷品云有人言乾慧地初焰佛地爲後焰有人言歡喜地爲初焰佛地爲後焰有人言初發心爲初焰佛地爲後焰如此解釋不同者恐是諸大乘論師釋滿字教門三教明位不同各取此意以釋初後焰問曰何意三藏教明位多同摩訶衍開爲三教判位不同耶答曰半字教門正明界內一世斷結便入涅槃小乘狹劣明事淺近不可動迭若是滿

字教門廣大深遠備明界內外行位法門權實無方說諸菩薩行類相貌位次不同無罣礙也故涅槃經云譬如隘道不容二人並行解脫不爾多所容受容受即真解脫真解脫內權實行位何所不容故龍樹菩薩作大智

伊八

十三

論種種因緣破迦旃延引毗婆沙釋三藏義明菩薩義正是欲申摩訶衍教不可思議行類階級隨緣不同也第二略明約通教開三乘者此通教約因緣即空之理分三乘也三人同稟通教見第一義諦同斷三界見思得一切智同求有餘無餘二種涅槃此義既同故約通教義以辯位也而分爲三乘者聲聞總相體法入空智慧力弱但斷正使根性不同亦有二種解脫如前三藏教中分別緣覺福德利根能少分別相體法入空生無佛世

不因聞法時至道熟自然曉悟見第一義斷三界結盡侵除習氣是名辟支佛乘根性不同亦有二種一者小辟支迦羅二者大辟支迦羅已如前說若菩薩具修總相別相智慧體因緣即空起大悲誓願以修諸行見第一義斷界內煩惱用誓願扶習還生三界用道種智遊戲神通淨佛國土成就衆生三乘善根淳熟即坐道場用一念相應慧斷煩惱習盡得一切種智名之爲佛轉生滅無生滅二種法輪化三乘衆生無餘涅槃是爲大乘故大品經云三乘之人同以第一義諦無言說道斷煩惱但是煩惱習盡不盡爲異又中論云諸佛以甘露味教化衆生諸法實相是真甘露味也佛說實相分爲三種若得諸法實相滅諸煩惱名聲聞乘若生大悲發無上意

伊八

十四

名爲大乘若佛滅度後時世無佛因遠離生  
智名辟支佛乘問曰若爾與前三藏教明三  
乘何異答曰前已處處說見第一義不殊但  
教門有拙度巧度之別觀門則有折體見真  
之殊彼明菩薩從初發心乃至補處未言斷

結使此明菩薩從初發心即斷結使乃至補  
處正使久盡殘習微薄此爲大異復次三藏  
教約生滅四諦十二因緣六波羅蜜三法分  
三乘今明通教則不如此三乘同觀無生四  
諦見第一義而分三乘之別者事如前解三  
乘同體假入空觀十二因緣見第一義而分  
三乘之別者事如前釋三乘同觀六波羅蜜  
見第一義而分別三乘之別者如前分別如  
此豈同三藏教之三乘也問曰菩薩可修六  
度二乘何得亦同修六度耶答曰涅槃經云

福德莊嚴有爲有漏是聲聞法何處有慳貪  
聲聞破戒瞋恚放逸散亂愚癡羅漢辟支佛  
耶但二乘之人不能徧行其事成就衆生何  
曾不同修六度第一義諦無言說道而能斷  
結耶問曰上引中論所明即應是大乘聲聞  
緣覺也答曰不然此雖通從大乘門入而二  
乘取涅槃證即身滅度故中論簡別得諸法  
實相滅諸煩惱名聲聞乘若生大悲發無上  
意名爲大乘若佛不出世辟支佛人因遠離  
生智此二既無大悲何得名爲大乘聲聞緣  
覺耶故法華經身子自歎云我等同入法性  
云何如來以小乘法而見濟度是我等咎非  
世尊也此則自迷得法實相非是大乘聲聞  
若如迦葉領解聞法華開權顯實云我等今  
者真是聲聞以佛道聲令一切聞也故不得

言見諸法實相即是大乘聲聞辟支佛也第三正明通教三乘位者即為二意一明三乘共十地二簡名別義通一明三乘共行十地位者即為二意一標名二解釋一標名者一乾慧地二性地三八人地四見地五薄地六離欲地七已辨地八辟支佛地九菩薩地十佛地故大品經云菩薩從初乾慧地至菩薩地皆行皆學而不取證佛地亦學亦證故言三乘通位也二解釋者釋乾慧地三乘初心通名乾慧地乾慧地者即是三賢之位一五停心二別相念處三總相念處一五停心者就此為三意一分別拙巧不同二正明停心之位三簡真偽一分別拙巧不同者三藏所明初賢與通教不同也彼約信解生滅四諦修五停心今約無生四諦信解修五停心二

種信解既拙巧不同故入停心之位目足不同也二正明五停心位所言賢者本是隣聖之義亦是直善之名今言直善即為二意一釋直義二釋善義一釋直義者信解直正異於外人邪僻又不同拙度之曲離此二邊名之為直所以然者三乘之人同聞無生四諦信解分明故得然也信無生苦諦者信五陰十二入十八界不生皆如夢幻響化水月鏡像畢竟空無所有是則解苦無苦苦雖無苦若不知無苦則為苦所苦名曰愚夫若知無苦此則無苦而有真諦信無生集者了一切煩惱業行皆如夢幻響化水月鏡像畢竟空無所有無和合相若不知無所有則有結業流轉知無所有是則解集無集是故無集而有真諦信無生滅諦者知一切生滅之法皆

不可得設使有法過於涅槃亦如夢幻響化  
水月鏡像本自不生今亦無滅若不知不生  
不滅則生滅終不自滅若知不生不滅則生  
滅自然而滅是則有真諦也信無生道諦者  
信一切至涅槃道皆如夢幻響化水月鏡像  
無有二相是則不見通與不通若見有二有  
通不通則成壅塞若知不二之相不見通與  
不通則任運虛通入第一義是則知道有道  
而有真也若三乘之人初入佛法信解此語  
分明名正直心但菩薩因此無生四諦起慈  
悲誓願故名摩訶薩也問曰若知諸法皆無  
所有是則不見真與不真何須結無生四真  
諦之名也答曰此約思益經涅槃制義非凡  
情自立得意忘言無生四真之名何足疑礙  
二釋善義者即是五停心之善法也此之五

伊八

七

法能發諸禪禪名棄惡亦名功德叢林止行  
二善無過於禪禪因五法此之五法內善之  
本也行人初心信解雖真但以五種不善隨  
其重著牽心馳散不得暫停如風中燈照物  
豈了欲知因緣即真必須一心禪寂如水澄  
清珠相自現是故覺觀多者教令數息因數  
息故心不動散得欲界定住未到地能發初  
禪乃至四禪四無色定如明鏡不動如淨水  
無波目足備故入清涼池是名直善直善之  
人能發無漏故說隣聖曰賢也是以大品經  
云阿那波那即是菩薩摩訶衍以不可得故  
此約初停心明賢人乾慧地之位不淨觀對  
破貪欲明停心入初賢乾慧之位亦如是故  
大品經云不淨觀即菩薩摩訶衍以不可得  
故慈心界方便因緣明停心入初賢乾慧之

位亦如是三簡真偽者問曰三乘初心信解無生四諦有真偽答曰迦羅迦果鎮頭迦果偽多真少於末世學三乘之人雖知無生四諦不識正因緣義即是迦羅迦果若無道心貪著名利即是迦羅迦果不知善巧修習止觀即是迦羅迦果破法不徧即是迦羅迦果不知通塞即是迦羅迦果不知道品調適進趣修習即是迦羅迦果不知對治助開三解脱門即是迦羅迦果不知位次生增上慢即是迦羅迦果不能安忍內外強軟兩賊即是迦羅迦果是則迦羅迦果乃有九分如女人不別將還家食眷屬皆死若能了知畢竟無所有而精解此之得失發諸順道法門而不愛著即是鎮頭迦果纔有一分也故中論云佛去世後人根轉鈍聞大乘法中說畢竟空

伊八

六

不知何因緣故空即生見疑若都畢竟空云何分別有罪福報應等如是則無世諦第一義諦取此空相而生貪著於畢竟空中生種種過龍樹菩薩造論意在此也智論云第三邪見破因緣果報亦破一切法與觀真空何異龍樹論主八翻復次簡別真偽具出云云問曰五停心善法有真偽不答曰一家次第禪門明發禪覺支若過不及有二十種壞禪邪覺即是迦羅迦果十種成禪善覺即是鎮頭迦果也問曰信解無生四諦智慧辯才即是般若何須數息五停心觀耶答曰大智論云空無相無作雖是智慧若無定心即是顛智慧狂智慧豈可說顛狂之人是初賢乾慧地耶二明別相四念處乾慧地位者三乘之人住靜定心修三種念處事相略如前三藏教

分別但此通教所明性念處但觀五陰即空  
法性之智慧名為性念處是以大品經說即  
色是空非色滅空色性自空空即是色離空  
無色離色無空受想行識亦復如是若觀此  
屬愛屬見身邊二見四見十四見及一切諸  
色皆不淨虛妄不實本自不生破色四邊見  
無生有四十八番乃至九十六番類前體假  
入空觀可知也不生即是空空即法性法性  
非垢非淨即破垢淨二倒是真不淨義名身  
念處若觀屬愛屬見一切諸受皆苦虛妄不  
實本自不生破受四邊見無生有四十八番  
乃至九十六番類前可知不生即空空即法  
性法性非苦非樂破苦樂倒是真苦義名受  
念處若觀屬愛屬見一切心皆無常虛妄不  
實本自不生破心四邊見無生四十八番乃

伊八

十九

至九十六番類前可知也不生即空空即法  
性法性非常非無常即破常無常倒是真無  
常義名心念處若觀屬愛屬見一切想行二  
陰皆無我虛妄不實本自不生破想行四邊  
見無生有四十八番乃至九十六番類前可  
知也不生故即空空即法性法性非我非無  
我即破我無我倒是真無我義名法念處也  
三乘之人觀五陰第一義諦修四念處時四  
念處中四種精進名正勤四種禪定名四如  
意足信等五種善生名之為根善根增長遮  
諸煩惱名之為力分別道用名為七覺安隱  
道中行名八正道此性四念處對破身邊二  
見四邊見無生結成四十八番乃至九十六  
番明二十一心無生四念處意甚難解自非  
徹思終不可見若修共念處事相如前但以

伊八

二十七

脢相脹相爛相壞等相背捨勝處皆如夢幻畢竟不可得為異也若修緣念處分別名義如前但知名字性離即解脫相無句義是菩薩句義如是通達一切名義即是緣念處三乘人修此三種念處皆以正勤如意足根力覺道善巧調適觀五陰一切諸法不取不捨能伏一切屬愛屬見八十八使三界二十五有一切結集故言善滅諸戲論也略說三乘通觀別相四念處住乾慧地但菩薩雖知五陰畢竟空寂而大悲誓願不捨眾生以無所得調伏諸根修行六度即是摩訶衍故大品經云四念處是菩薩摩訶衍以不可得故問曰通教性念處理既是通破八倒何須別對答曰三藏教別相四念處既別破四倒明乾慧地位既是齊對其別破拙但破四倒今明

別破之巧故還用別以破八倒也三明總相四念處乾慧地位者總相三種四念處如前三藏教分別但以如幻如化體法即空為異耳是為無生總相四念處住是總相念處中若修身念處即觀五陰十二入十八界一切諸法總破八倒是名身念處受心法念處亦如是住是總相四念處修正勤如意足根力覺道雖未發暖法相似無漏法水而總相觀五陰智慧深利勝別相四念處是則名總相四念乾慧地外凡之位也問曰三乘人通觀伊八第一義諦同破八倒應同見佛性何故通教人入二涅槃也答曰破八倒有四種意一破八倒不結枯榮是則通別圓不定二破八倒結成四枯定成通教三破八倒結四榮定成別教四破八倒結枯榮即是圓教今明破八

倒用淨名訶迦旃延破三藏五義說摩訶衍  
五義即結成四枯故二百比丘心得解脫正  
屬通教意也二明性地若因總相念處成三  
十七品初發善有漏五陰名暖法暖法義如  
前說增進初中後心入頂法忍法乃至世第  
一法名為性地內凡性地之義皆如前說但  
以從乾慧地習無生方便異故所論性地初  
中後心解慧善巧亦有殊別拙巧雖復不同  
而俱伏界內見諦之感也三明八人地者即  
是三乘信行法行人體見假以發真斷見諦  
或在無間三昧即八人之位也四見地者即  
是三乘同見第一義無生四諦之理同斷見  
惑八十八使盡也問曰上明體法入空破屬  
愛屬見今何故見惑前盡屬愛在後方斷答  
曰見新愛舊體假入空雖復俱破見則易盡

愛則難除譬如斷藕若手折斷藕斷絲連若  
用刀斷藕絲俱絕次第證果之人見惑雖盡  
思惑猶在超證之人則見思俱斷也五薄地  
者體愛假即真發六品無礙斷欲界六品證  
第六解脫欲界煩惱薄也六離欲地者即是  
三乘之人體愛假即真斷欲界五分結盡離  
欲界煩惱也七已辦地即是三乘之人體色  
愛無色愛即真發真無漏斷五上分結七十  
二品盡也斷三界事惑究竟故言已辦地也  
八辟支佛地者緣覺發真無漏功德力大故  
能侵餘習也九菩薩地者從空入假道觀雙  
流深觀二諦進斷習氣色等無明得成界外  
法眼道種智遊戲神通淨佛國土成就眾生  
學佛十力四無所畏十八不共法大慈大悲  
斷習氣將盡也十佛地者大功德力資智慧

一念相應慧觀真諦究竟習氣究竟盡也故  
智度論云聲聞智慧力弱如火燒木雖然  
猶有炭在緣覺智慧力勝如火燒木木然  
炭盡餘有灰在諸佛智慧力大如劫燒火灰  
炭俱盡亦如兔馬象三獸度河之喻也問曰  
菩薩佛地名異二乘何得言通也答曰名雖  
有異同是無學應供得二涅槃共歸灰斷證  
果是一名義不殊是則名義究竟俱同也二  
簡名別義通者即為二意一約前三乘共十  
地菩薩別立忍名二明用別教名名別義通  
一明用通教位立別位名別而義通者義通  
已如前說今言名別者別為菩薩立伏忍柔  
順忍無生忍之名也所以者何乾慧地三乘  
同伏見惑而菩薩別受伏忍之名者菩薩信  
因緣即空而於無生四諦降伏其心起四弘

伊八

二十三

誓願雖知衆生如虛空而發心度一切衆生  
是故度衆生如度虛空故金剛般若經云菩  
薩應如是降伏其心所謂滅度無量無邊衆  
生實無衆生得滅度者次明三誓願降伏心  
亦如是故在乾慧修停心特別名為伏忍異  
二乘也別相總相念處皆名伏忍亦如是復  
次三乘之人同發善有漏五陰生相似解皆  
能柔伏見惑順第一義諦理而菩薩獨受柔  
順忍名者菩薩非但伏結順理又能為一切  
衆生伏心徧行六度一切事中福德智慧皆  
令究竟如三藏教門三阿僧祇修六度乃至  
不惜身命至中忍滿今此菩薩亦如是以空  
無相無願調伏諸根欲為衆生滿足六度故  
名柔順忍也復次三乘之人同發真無漏若  
知若斷同名無生而菩薩獨受無生法忍名

者以其見第一義諦雖斷結使而不生取證之心故別受無生法忍之名也所以者何若生取證心即墮二乘地不得入菩薩第九地復次三乘同得神通而二乘不能用神通成就衆生淨佛國土故不得受遊戲之名菩薩

能爾故名菩薩受遊戲神通之名阿那含雖斷五下分結而不能捨深禪定來生欲界和光利物而不同塵菩薩能如是故別說爲離欲清淨也問曰通教三乘同觀二諦約位云何分別答曰二乘雖觀二諦一向體假入空

用真斷結至無學果菩薩亦觀二諦始從乾慧終至見地多用從假入空觀得一切智慧眼多用真也從薄地學遊戲神通多修從空入假觀得道種智法眼多用俗也從辟支佛地學二觀淳熟雙照二諦入菩薩地自然流

第八

二十四

入薩婆若海是則無功用心修種智佛眼佛地圓明成一切種智佛眼圓照二諦究竟也故大智論云聲聞法中名乾慧地於菩薩即是伏忍聲聞法中名性地於菩薩法中名柔順忍於聲聞法名八人地於菩薩法名無生忍於聲聞法名爲見地於菩薩法名無生法忍果聲聞法名薄地於菩薩法名爲遊戲五神通聲聞法名離欲地於菩薩法名離欲清淨阿羅漢地於聲聞法即是佛地三藏佛三十四心發真斷三界結盡與羅漢齊也大品經云阿羅漢若智若斷是菩薩無生法忍大品經云辟支佛若智若斷是菩薩無生法忍即對菩薩八地侵除習氣九過辟支佛地入菩薩位菩薩位者九地十地是則十地菩薩當知如佛齊此習氣未盡過菩薩地則入佛

地用誓願扶習氣生間浮提八相成道五相  
 如前料簡大小乘同異如智度論分別六成  
 道相者菩提樹下得一念相應慧與無生四  
 諦理相應斷一切煩惱習盡具足大慈大悲  
 十力四無所畏十八不共法四無礙智一切  
 功德智慧者名之為佛七轉法輪相者權智  
 開三藏生滅四諦法輪實智說摩訶衍無生  
 四諦法輪通三乘人也八入涅槃相者雙樹  
 入無餘涅槃如薪盡火滅留舍利為一切人  
 天福田也是名通教大乘八相成道是則三  
 乘之人同見真諦之理同得二種涅槃但大  
 乘有八相成道之異是為通教大乘別為菩  
 薩立名位也二明用別教別位名名別而義  
 通者即是三乘同觀第一義諦之理取別教  
 之名辯菩薩位也就此則為二意一正約名

別義通判位二料簡一正約名別義通辯位  
 者即是十信三十心十地之名也錢輪位即  
 是乾慧地伏忍三十心即是性地柔順忍八  
 人地見地即是初歡喜地得無生忍故大品  
 經云須陀洹若智若斷是菩薩無生法忍薄  
 地向果向即離垢地果即發光地也故大品  
 經云斯陀含若智若斷是菩薩無生法忍阿  
 那含地向果向即炎地果即是難勝地故大  
 品經云阿那含智斷是菩薩無生法忍羅漢  
 地向果向是現前地果是遠行地故大品經  
 云阿羅漢智斷是菩薩無生法忍辟支佛地  
 即是第八不動地侵除習氣也故大品經云  
 辟支佛智斷是菩薩無生法忍菩薩地即是  
 第九善慧地十法雲地當知如佛佛地如前  
 說生道場時一念相應慧斷二障習氣盡所

伊八

二十六

謂煩惱障法障之習氣也化一切有緣眾生  
竟入無餘涅槃如薪盡火滅八相成道如前  
說是則用別教名辯位名異而義同猶屬通  
教之位也第二料簡者問曰從初地至七地  
對四果出何經論耶答曰經論非不對當但

高下不同末代法師對當亦多殊異所以然  
者或云見地止對初地此如今所用或取三  
地併對見地仁王經明四地併對見地此則  
難可定依但通教見地本是無間之道不出  
觀證須陀洹豈得從初地斷見乃至三地或  
云四地耶若斷別惑不共二乘如此明義或  
當有之又或言六地斷結與羅漢齊或云七  
地名阿羅漢此難定執前後兩果經論對既  
不定其間二果以意可知既不可定依今用  
義推作此對位雖一往小便終不可定執也

四教義卷第四

音釋

埵 都火切 捷 渠馬切 翳 吉器切 怯 乞協切 窟 苦骨切  
 胸 日輪切 動也 鶴 古杏切 剔 他歷切

四教義卷第五

伊九

隋天台山修禪寺沙門 智顛 撰

第三約別教明位釋淨無垢稱義者別教詮因緣假名如來藏佛性之理菩薩稟此教門修行得證必有淺深故須明位此別教入道亦有四門一有門二空門三亦空亦有門四非空非有門別教雖有四門而尋經論意多用亦空亦有門明行位也如涅槃經云第一義空名為佛性又云智者見空及與不空聲聞辟支佛但見於空不見不空不空者即佛性也若赴機利物四門入道各逐根緣豈可偏用但一往明位義便事須如此是以今明別教行位還約空有門以辯也就此即有四意一經論出別教菩薩位不同二總明位三別解釋四約教位釋淨無垢稱義第一經論

出別教菩薩位斷伏對法門不同者尋別教正明因緣假名恒沙佛法佛性涅槃常住之理菩薩稟此教觀三諦理歷劫修種種行斷恒沙無知別惑欲見佛性求常住四德涅槃是則教別理別智別斷別行別位別因別果別此唯明一乘二乘聞此如聾若啞但諸經明此別位名數多少斷伏高下對論諸法門多有不同者即為三一者位數不同二斷伏高下不同三對法門不同一位數多少不同者如華嚴經明三十心十地佛地有四十一地瓔珞經明五十二位仁王經明五十一位新翻金光明經但出十地佛果勝天王般若大品經等亦但明十地佛地不辯三十心等覺地也涅槃經明五行十功德約義配位似開三十心十地佛地而文不出名又十地論

伊九

二

攝大乘論地持論十住毗婆沙論大智度論並釋菩薩地位如此等諸經諸論明菩薩位名數多少不同斷伏高下亦異對諸法門明位非無殊別所以然者此既明界內界外生法兩身菩薩行位如來方便用四悉檀化界內衆隨機利益豈得定說若不廣尋經論則不知同異偏取定執空增諍論此同無目而諍天上日今明別教大乘次位須用瓔珞仁王兩經若明斷伏高下須約大品三觀若明觀行對法門意取涅槃五行釋義對諸法門隨便採諸經論一家說法正在初心觀門教門須分明也諸佛菩薩三乘聖位此非凡測寧可妄說而須明位知大意者若行修道破增上慢心若說法講經權須消文引物希向又欲令聽者咸知大乘經論出別教菩薩位

行不同寧可偏執是非諍競耶問曰何意約數的取瓔珞仁王判位名目答曰華嚴頓教多明圓位四十一地又不出十信之名諸大乘方等經文多明諸法門不正辯位前四時般若亦多明菩薩觀行法門意亦不在辯位今謂瓔珞明五十二位名義整足恐是結成諸大乘方等別圓之位也仁王般若明五十一位恐是結成前四時般若別圓之位也法華但開藏通別之權位顯一圓位涅槃大意亦明別圓兩位而不的出名目問曰斷伏高下何故約大品三觀答曰一家義便問曰別教觀行對法門何故取涅槃五行答曰未代入道正得其宜別教明觀行有二種一者不共二乘說如華嚴十地論地持九種戒定慧及攝大乘論二者共二乘說如方等大品中

論釋論明涅槃五行實為末代行用之要也  
第二總明別教菩薩位者即為三意一約瓔  
珞經明位數二約大品經三觀明斷伏三約  
涅槃經對法門辯位一約瓔珞經明位數者  
瓔珞經有七種明位七位者一者十信二者  
十住三者十行四者十迴向五者十地六者  
等覺地七者妙覺地初十信即是外凡別教  
乾慧地伏忍之位也十住即是習種性位從  
此已去盡三十心解行位悉是別教之內凡  
性地柔順忍位也約別教義推如暖法也十  
行者即是性種性別教義推如頂法也十迴  
向即是道種性別教義推如忍法也世第一  
法也問曰別教何須明暖頂忍邪答曰十地  
既對四果故須明也通教通真似解說為暖  
頂忍世第一法今別教別真似解義立此名

比決分明也次十地即是聖種性此皆入別  
教四果聖位悉斷無明別見思惑也六等覺  
位即是等覺性若望菩薩名等覺佛若望佛  
地名為金剛心菩薩亦名無垢地菩薩也七  
明妙覺地亦名妙覺性即是究竟佛菩提果  
大涅槃之果果也二約大品經及三觀合位  
明斷伏高下者大品經云佛告舍利弗菩薩  
欲具足道慧當學般若波羅蜜即此是十信  
習從假入空伏愛論見論欲入十住位若得  
十住即斷界內見思也欲以道慧具足道種  
慧當學般若若此即修從空入假入十行也欲  
以道種慧具足一切智當學般若若此即修中  
道正觀入十迴向位也欲以一切智具足一  
切種智當學般若若此即是證中道觀入十地  
也欲以一切種智斷煩惱習當學般若若此即

是等覺地無明煩惱習盡名之爲佛即是妙覺地也問曰智度論何故云佛說三智一心中得答爲辯圓教從初一地即具足一切諸地若執此義即乖三慧品說別相三智之義也三約涅槃經明五行合位者初戒聖行定聖行生滅四諦慧聖行即是十信位次無生四眞諦聖行即是十住位次無量四聖諦即是十行位次明修一實諦無作四聖諦即是十迴向位次若發眞見一實諦證無作四聖諦即是聖行滿住無畏地得二十五三昧能破二十五有名歡喜地五行具足次後而說十功德者恐此表住大涅槃十地之功德也過此明住大涅槃即是妙覺地第三歷別解釋者釋七番別位初明十信心者一信心二念心三精進心四慧心五定心六不退心七

伊九

五

迴向心八護法心九戒心十願心此十通名信心者信以順從爲義若聞說別教因緣假名無量四諦佛性之理常住三寶隨順不疑名信心也今略釋初信心義即爲二意一發菩提心二行菩薩道發心即是目修行即是足目足備故入清涼池即是別教初賢善直之義也一發菩提心者聞大涅槃方等經典因信解心大悲普願發也大涅槃經明有五行一聖行二梵行三天行四嬰兒行五病行云何菩薩修聖行若從如來聞大涅槃經聞已生信作是思惟諸佛世尊有無上道有大正法大衆正行復有大乘方等經典我當願樂割愛修道即是信心所以者何若聞大涅槃經信心歡喜即信佛性常住三寶即是信非因非果大涅槃果也若聞五行心生愛樂

即是信非因之因聖行因也若信心開發即是發菩提心欲行菩薩道發菩提心者即慈悲憐愍一切衆生於無量四聖諦慈與衆生無量道滅之樂悲拔衆生無量苦集之苦起無量四弘誓願未度無量苦諦者令度未解無量集諦者令解未安無量道諦者令安未得無量滅諦者令得大涅槃常樂我淨是爲別教菩薩因於信解初發菩薩心也問曰前明因大涅槃經四種聖諦約此人辯別教菩薩位今何但約無量四聖諦發弘誓不取餘二種四諦發願耶答曰若在別教此四種四諦皆名無量所以者何菩薩觀無量生滅四諦調心異於二乘觀無量無生滅四諦斷界內結異於二乘觀如來藏無量四諦之理雖非即是無作而二乘亦不聞其名若證無作

四諦爾時無作亦名無量所以者何依一實諦即有四諦名爲無作世間出世間因果法相數量無邊與虛空等亦名無量緣無量四諦發菩提心即是四種四諦也問曰若生滅無生滅二種四諦皆名無量者何故勝鬘經說名有量四聖諦耶答曰雖復數無邊量在二乘心同歸灰斷故名有量也問曰若有無作何意不約無作發心答曰此無作猶是無量以無作證果時名非不思議無作也如生滅盡非是無生四諦也二明修菩薩行者即是受持讀誦大乘方等爲人解說自行聖行亦教人行聖行自行聖行者大涅槃經聖行有三種一戒聖行二定聖行三慧聖行菩薩思惟佛性之理幽微難見初心不可頓入必須持戒修定慧次第三觀調心而入中道三

諦惑障若除方乃得道見於佛性住大涅槃  
別相三觀如前說一戒聖行者菩薩護持五  
篇之戒如護浮囊愛見二種煩惱羅刹來乞  
若能與我令汝得入涅槃者令得屬愛世間  
樂之涅槃屬見世間樂之涅槃也菩薩若不  
隨愛見破戒即具五支諸戒所謂具足菩薩  
根本業清淨戒前後眷屬餘清淨戒非諸惡  
覺覺清淨戒護持正念念清淨戒迴向具足  
無上道戒又復護持性重戒息世譏嫌戒等  
無差別如是持戒施與一切衆生願一切衆  
生得清淨戒善戒不缺戒不析戒大乘戒不  
退戒隨順戒畢竟戒具足戒成就諸波羅蜜  
戒菩薩善能護持諸戒得入於初不動地菩  
薩住不動地中不動不退不散是名菩薩修  
戒聖行二修定聖行者所謂從初安般隨息

觀息入根本特勝通明淨禪見身三十六物  
如明眼之人開倉見穀粟麻豆又分別三十  
六物不見有我及修八背捨觀禪觀身內外  
不淨除却皮肉諦觀白骨見骨色相異所謂  
青黃白色鴿色如是骨相亦復無我得觀禪  
欲界之定菩薩爾時次第觀骨觀青骨時見  
此大地東西南北悉皆青相黃白鴿色亦復  
如是此即是得觀禪未到地定成也又云作  
是觀時眉間出青黃赤白鴿等色光光中見  
佛是為初背捨乃至成就八背捨八勝處十  
一切處九次第定師子奮迅三昧超越三昧  
菩薩住背捨勝處諸禪定中修四無量心六  
波羅蜜四攝法神通變化即是共念處又因  
受持讀誦大乘方等於禪定中思惟名義修  
四無礙辯即是緣念處若念處成就即得住

於堪忍之地是名菩薩修定聖行此二念處若未與性念處相應猶屬停心初賢位也三修慧聖行者即是四諦大涅槃經云所言苦者逼迫相集者能生長相滅者寂滅相道者大乘相又復苦者現相集者轉相滅者除相道者能除相又苦者三苦集者二十五有滅者滅二十五有道者修戒定慧此即是先觀生滅四諦調伏界內見思煩惱修性念處即是正觀苦諦若觀是苦集是苦滅是苦滅道如是正觀生滅四諦傍觀無生無量中道佛性之理而正用生滅四諦伏界內屬愛屬見一切煩惱結集皆是性念處智慧力也性念處義具如前說菩薩得是性念處與前共緣處合即是堪忍地智慧善根增長從初信心乃至願心十心成就即是鐵輪外凡乾慧伏

忍也問曰別教菩薩成就幾法所得信心異前通教答曰還約十法即知不同一信正因緣者即是知四種四諦因緣不亂也二真正發心知於無量四諦發慈悲誓願也三勤修止觀者即知次第善修四種止觀也四破法徧者即觀因緣生滅空假中三諦惑徧也五知通塞者即知四種道滅是通四種苦集即是塞也六善修道品者即是知次第修四種三十七道品也七善修助道法者即是背捨勝處能成一切對治六波羅蜜助開三解脫門也八善識次位者即知因四種<sup>九</sup>四諦入七位不叨濫也九安忍強輒賊者即是知修四種道諦時於四種苦集心能安忍也十順道法愛不生者即知次第修四種道諦發諸順道法不生愛著心也別教信心菩薩解此十

事分明異於通教之信心也此之十法深解  
義趣即得用釋十信心至下明圓教十信備  
出其相也瓔珞經云一信有十十信有百此  
之百法爲一切道法之根本也二明十住位  
者即是十解習種性初入內凡十賢之位也  
一發心住二持地住三修行住四生貴住五  
方便具足住六正心住七不退住八童真住  
九法王子住十灌頂住此十通名住者會理  
之心名之爲住故仁王般若云入理般若名  
爲住此即體假入空觀成發真無漏見通教  
真諦之理斷界內見思惑九十八使故名發  
心住也此有二義一發真解住偏真法性之  
理二生中道似解住第一義佛性之理若生  
偏真之解即是通教八人地見地智斷齊生  
中道似解是初得別教善有漏五陰入別教

內凡性地柔順忍之位也所以者何是菩薩  
因前持戒禪定生滅四諦智慧調心觀無生  
四諦斷界內見思煩惱是聲聞經說五種佛  
子位齊五種佛子者一須陀洹佛子二斯陀  
含佛子三阿那含佛子四阿羅漢佛子五辟  
支佛佛子開一爲二合十品即對十住位斷  
見思煩惱及習氣是辟支佛齊侵斷恒沙上  
品但菩薩觀無生四諦如涅槃經說凡夫有  
苦無苦諦聲聞緣覺有苦有苦諦而無真實  
諸菩薩等解苦無苦是故無苦而有真諦凡  
夫有集無集諦二乘有集有集諦諸菩薩等  
解集無集是故無集而有真諦聲聞緣覺有  
道非真菩薩有道有真聲聞緣覺有滅非真  
菩薩有滅有真無生四真諦具如通教初說  
但大涅槃明此滅諦是常樂者此意與通教

有同有異同即四諦即真通教三乘觀無生  
四諦見第一義即真諦也別者菩薩知於空  
即是不空別知佛性涅槃常樂我淨也問曰  
若爾涅槃何得說二乘有苦有苦諦而無真  
實答曰此明聲聞經三藏教門所辯非關摩  
訶衍初門通教也若得滅道能觀佛性常住  
即發中道似解為別教之暖法也三明十行  
位者即是性種性內凡十賢一歡喜行二饒  
益行三無瞋恨行四無盡行五離癡亂行六  
善現行七無著行八尊重行九善法行十真  
實行此十通名行者行以進趣為義前既發  
真悟理從此加修從空入假觀無量四諦無  
量四諦如大涅槃經說知諸陰苦名為中智  
分別諸陰有無量相悉是諸苦非諸聲聞緣  
覺所知是名上智是名無量苦諦知諸入者

伊九

十一

名之為門名為苦諦分別諸入有無量相悉  
是諸苦即是無量苦聖諦也知十八界名之  
為分亦名為性即是苦諦分別諸界有無量  
相悉是諸苦是名無量苦聖諦所言無量集  
聖諦者知愛因緣能生五陰名之為集一人  
起愛無量無邊況一切眾生所起諸愛如是  
等愛無量無邊即是無量集聖諦也所言無  
量滅聖諦者知滅煩惱名為滅諦分別煩惱  
不可稱計滅亦如是不可稱計即是無量滅  
聖諦也所言無量道聖諦者能斷煩惱名為  
道諦分別道相無量無邊所離煩惱亦無量  
無邊即是無量道聖諦也如是四諦大涅槃  
經說悉云非諸聲聞緣覺所知故知此屬別  
教菩薩之所學也菩薩住此無量道諦學十  
波羅蜜一切諸道斷塵沙無知中品十行成

就從空入假平等觀成也得道種慧法眼清淨相似中道之解轉更分明即是別教頂法之位菩薩住此位中遊戲神通淨佛國土成就衆生也四明十迴向者即是道種性內凡後十賢也一救護一切衆生離衆生相迴向

二不壞迴向三等一切佛迴向四一切至處迴向五無盡藏功德迴向六隨順平等善根迴向七隨順等觀一切衆生迴向八如相迴向九無縛無著解脫迴向十法界無量迴向此十通名迴向者迴事向理迴因向果迴已

功德普施衆生事理和融順入法界故名迴

向正修中道第一義觀從無量四諦學無作四諦也約實說四實不作四故名無作之四觀四得實故名四實因名無量得果名無作證果斷苦集有道滅非圓教之無作也今立

無作四實諦名義意在此故涅槃云一實諦者名為真法若法非真不名實諦實諦名無顛倒無顛倒者名為實諦實諦無有虛妄若有虛妄不名實諦實諦名為大乘非大乘者不名實諦實諦是佛所說非魔所說若是魔說非是實諦實諦者一道清淨無有二也有常有樂有我有淨是則名為實諦之義又涅槃云一實諦者即是如來虛空佛性無差別也有苦有諦有實有集有諦有實有滅有諦有實有道有諦有實如來非苦非諦是名為實虛空佛性亦復如是又涅槃云所言苦者名無常相是可斷相是為實諦如來之性非苦非無常非可斷是名為實虛空佛性亦復如是所言集者能令五陰和合而生亦名為苦亦名無常是可斷相是為實諦如來非是

集性非是陰因非可斷相是為實諦虛空佛性亦復如是所言滅者名煩惱滅亦常無常二乘所得名曰無常諸佛所得是則名常亦名證法是為實諦如來之性不名為諦能滅煩惱非常非無常不名證知常住無變是故

伊九

十三

名實諦虛空佛性亦復如是所言道者能斷煩惱亦常無常是可修法是名實諦如來非道能斷煩惱非可修法常住不變是為實諦虛空佛性亦復如是若菩薩學無量無作四諦觀觀知如來藏無量生死種子恒沙佛法斷恒沙下品煩惱伏無明別惑見相似中道之解更轉增明法界願行事理和融成別教一切智得六根清淨即是別教忍法世第一法位五明十地者此是聖種性位從此見佛性發中道第一義諦觀雙照二諦心心寂滅

自然流入薩波若海證無作四諦一實平等法界圓融從初地至佛地皆斷無明但以約位分為三道初地名見諦道二地至六地名為修道從七地已去名無學道十地者初歡喜地二離垢地三明地四皎地五難勝地六現前地七遠行地八不動地九善慧地十法雲地此十通言地者一能生成佛智住持不動二能與無緣大悲荷負一切故名為地也初歡喜地名見道者初發真中道見佛性理斷無明見惑顯真應二身緣感即應百佛世界現十法界身入三世佛智地能自利利他真實大慶故名歡喜地也大涅槃云菩薩聖行滿即是住於無所畏地即是初地初地菩薩離五怖畏無死畏無不活畏無惡道畏無惡名畏無大眾威德畏涅槃經雖不作此名

伊九

十四

義推辱同若言不畏貪欲恚癡內無三毒外離八風無惡名畏也若言不畏地獄等即無惡道畏若言不畏沙門婆羅門即無大衆畏今既入無畏地見中道則無二死故言無死畏也法身常命已顯無不活畏以得入此地故則具二十五三昧破二十五有顯二十五有之我性我性即是實性是名慧行成就得王三昧即五行成住於無畏之地即得初地之名也就此即爲五意一明得二十五三昧聖行成二明梵行三明天行四嬰兒行五明病行一明得二十五三昧聖行成者即爲三意一釋二十五三昧名二正明修二十五三昧成三外用利物一釋二十五三昧名者略爲四意即是約四悉檀而立名也一者隨時趣立名二隨便立名三隨治立名四隨理立

名一隨時立名者譬如人有二十五子隨時名作一字大者初生爲作一字次者後生又作一字不可見大兒名此亦令第二者名此如是則濫此二十五名亦如是各舉一名令世諦不亂世間名字皆爾不可求定實也二者隨二十五有便立名若作餘名事義不便是故隨便立名也三者隨對治立二十五三昧名各治一有因是故對治得名四隨理立名者此二十五不出法性理理含於義從義而立名名義雖別理實無異約此四意故得立二十五三昧名也詳經文意多用對治約理兩義以立二十五三昧名二正釋修成二十五三昧者一一三昧中皆有四意一出諸有行業惑障二用三昧治破三結成三昧四慈悲破有一一悉具此四意也初約無垢三

昧破地獄有即為四意一明業結者罪之尤重莫若地獄惡業垢重見思垢塵沙垢無明垢二明用三昧破者菩薩為破此諸垢故修前根本戒破惡業垢修前八背捨等定伏見思垢修有作無生等慧斷見思垢修無量慧破塵沙垢修無作慧破無明垢三明結成三昧者破見思垢故真諦三昧成破惡業垢及塵沙垢故俗諦三昧成破無明垢故中道第一義三昧成四明慈悲利他菩薩已自破地獄故得三諦三昧有大慈悲真熏法界眾生有機關於慈悲以王三昧力法性不動而能應之如薩婆藪調達應入地獄隨其所宜而為說法破地獄有如聖行所明自修戒定慧等諸行故自證三諦三昧成於聖行中有慈悲誓願故破他三諦上垢亦破他三諦上惡

業煩惱垢自既無垢令他無垢故此三昧名無垢三昧也自下具此四意類前可知次不退三昧破畜生有者畜生無慚無愧起惡業故退失善道見思故退塵沙故退無明故退菩薩為破諸退故修戒忍破惡業退修定伏見思退修生滅無生慧破見思退修無量慧破塵沙退修無作慧破無明退見思破故位不退三昧成塵沙破故行不退三昧成無明破故念不退三昧成自以修行力破三種退滅三不退自得三諦三昧慈悲之力真熏法界隨畜生有機感或為象王啄鳥大鷲之身隨其所宜而生其中而為說法破畜生有自既不退令他不退故此三昧名不退三昧也次心樂三昧破餓鬼有者餓鬼常為慳業纏繫貪愛飢餓苦見思煩惱苦塵沙無知苦無

明闇蔽苦菩薩為破是諸苦修戒施破慳惡業苦修定伏見思苦修生滅等慧破見思苦修無量慧破塵沙苦修無作慧破無明苦破見思苦故真諦無為心樂三昧成破慳惡業塵沙苦俗諦分別多聞心樂三昧成破無明苦中道常樂三昧成以自修行證得三樂三諦三昧以諸行中慈悲之力熏現諸鬼形聲施令得飽滿而為說法令破三種苦得三種樂菩薩自得此樂又令他得樂是故三昧名心樂三昧也次歡喜三昧破阿修羅有修羅多忿恚惡業怖見思怖塵沙怖無明怖菩薩為破是諸怖故持戒精進而修諸行不破戒喜破惡業怖修禪悅喜伏見思怖修生滅等慧得喜覺喜破見思怖修照鏡喜及無量喜破塵沙怖修無作慧破無明怖見思破故真

伊九

十七

空喜悅三昧成惡業塵沙破故一切眾生喜見三昧成無明破故喜王三昧成以已修行力得如此三諦歡喜三昧以諸行中慈悲之力熏修羅有而生其中轉言調伏而為說法破修羅有令得無怖自無三怖自證三喜令他無怖令他得歡喜故三昧名為歡喜也次日光三昧破弗提婆有者日初出於東隨便為名日譬智光能照迷暗破惡業迷暗見思塵沙迷暗無明迷暗菩薩為破此之迷暗故修善業戒光修禪定流光修生滅無生滅一切智光修道種智光修一切種智光明生暗滅以善戒光破惡業暗禪定光伏見思暗以生滅無生滅慧光破見思暗修無量道種智光破塵沙暗修無作一切種智光破無明暗破見思暗故一切智日光三昧成破塵沙暗

故道種智日光三昧成破無明暗故一切種  
智日光三昧成以修行力自證如是三諦三  
昧以慈悲力熏弗婆提有應現說法破其三  
迷顯三諦智日光故此三昧名爲日光三昧  
也次月光三昧破瞿耶尼有者月之初生光  
現於西此隨便立名也月光亦譬破暗釋三  
昧四意類日光三昧可知次釋熱炎三昧破  
鬱單越有者北方是陰地冰結難消自非熱  
炎終不消也鬱單越人冰執無我我所難可  
化度非智火熱炎無我所心終不可消彼無  
我我所乃是妄計無我所理實由有性人我  
之惑有法我惑真如我惑冰執未融也菩薩  
爲破此諸我惑冰執修生滅無生滅等真無  
我慧破性人我惑修無量四諦破法我惑修  
無作四諦慧破真如我惑若得真人空智炎

破性人我惑真諦三昧成得真法空智炎破  
法我惑得俗諦三昧成故能如空種樹順俗  
以化物也得真如無我智炎破真如我惑知  
非我非無我是真我義無我法中有真我即  
見鬱單越之我性即有三昧成心心寂滅也  
菩薩自證三諦三昧慈悲力故現鬱單越形  
聲破北方無我所令成真我三昧故此三  
昧名爲熱炎三昧也次如幻三昧破閻浮提  
有者南方果報雜壽命短促不定由如幻化  
此是幻出惡業果幻出煩惱幻出無知幻出  
無明一切衆生不知如幻今菩薩爲破是諸  
幻故修三種三昧修真諦三昧幻出無漏破  
見思之幻修俗諦三昧幻出道種智破無知  
之幻修中道三昧幻出一切種智破無明之  
幻修行力故自證三諦三昧成慈悲之力故

破他力成是故名爲如幻三昧也次不動三昧者破四天王有此天守護國土遊行世界身報流動此則是果報動見思動無知動無明動一心修善不動及修背捨等不動業破果報動真慧不動破見思動出假慧不動破無知動中道不動如須彌頂破無明動修行力故自證三種不動慈悲力破他三動故此三昧名爲不動也次難伏三昧破三十三天有者此天居四天之頂即是果報難伏見思難伏無知難伏無明難伏菩薩爲破其高心是故修戒定慧破果報難伏修生滅無生滅故破見思難伏修無量慧故破無知難伏修中道故破無明難伏自行力故成三難伏慈悲力故破他三難伏故此三昧名爲難伏悅意三昧破炎摩天者此天處空無刀杖畏以

之爲悅實非是悅未有不動業悅未有無漏悅未有道種智悅未有中道悅菩薩爲破此故修四諦觀八背捨中禪悅破其動散不悅生滅無生破其有漏不悅無量慧破沉空不悅無作慧破二邊不悅以無生悅故真諦三昧成出假稱機之悅故俗諦三昧成中道悅意故中道三昧成自行力故自證三昧成以慈悲力故破他三昧成故名悅意三昧也次青色三昧破兜率天者此天果報樂青服翫皆青菩薩爲破此有故修第一義非青真見青真非青假見青假故得中道見青中道破其青有義推可知次黃色三昧破化樂天有次赤色三昧破他化自在天有類前青色三昧可解也次白色三昧破初禪有者初禪離欲界五蓋不善即是定心善白但未離見思

塵沙無明等黑菩薩為破是諸黑行故修三諦白法破惑之義推之可知次種種三昧破梵王者梵王主三千大千大千品類既多故有種種之號為破其種種故修種種空入種種假見種種中道如來藏多所含藏名種種三昧也義推可知也次雙三昧破二禪者二禪獨有內淨喜兩支故受雙名菩薩為破此雙故修雙空雙假雙中雙照二諦義推可知次雷音三昧破三禪者此禪受樂最為第一著樂深入如冰魚蟄蟲菩薩為破此樂故用三諦雷音以驚駭推之可知次注雨三昧破四禪者四禪如大地具種種芽若不得雨芽則不生一切善根在四禪中若得三諦雨三智善發生也義推可知次如虛空三昧破無想天者此是外道天實非無想而計為無想

涅槃如小兒夢尿菩薩為破是有故以三諦空破無想故言之也次照鏡三昧破那含有者修熏禪隨禪生此雖得淨色不能知色如鏡像菩薩知色如鏡像即空分別無量像依鏡即見本性中道成三諦三昧破那含有也次無礙三昧破空處者此處得出色籠飄颻無礙未是三諦三昧之無礙見思礙塵沙礙無明礙菩薩為修三諦三昧破是諸礙故名無礙也次常三昧破識處識相續不斷即無常菩薩為破此無常故修數緣常化用相續常佛性常湛然常破之也次樂三昧破不用處者此不用處如癡癡故是苦菩薩用三諦三昧破得三諦三昧樂是為樂三昧也次我三昧破非想天者此天最頂計為涅槃真我菩薩見此由有細煩惱不自在即是見思不

伊九

三十一

自在塵沙不自在無明不自在何得是我爲  
破此我故修三諦三昧破之令得無我隨俗  
我八自在我是故名我三昧云云二十五有用  
自修二十五三昧一有之中悉有三諦菩薩  
自修三諦三昧自除二十五有三諦惑以慈  
悲力除他二十五有三諦之惑由是得二十  
五三昧之名或從無住之本用四悉檀立二  
十五名如前說通言三昧名調直定也真諦  
三昧以離愛見而爲調直俗諦三昧以稱機  
爲調直中道以無二邊之曲爲調直是故皆  
名三昧若但入空之直不名爲直聲聞人得  
入空非王三昧若入假亦非究竟菩薩雖得  
道種智亦不名王三昧以得中道三昧故稱  
之爲王以二十五三昧一一皆有中道三昧  
是故稱二十五三昧悉是王三昧涅槃經云

是二十五三昧名諸三昧王若入王三昧一  
切三昧悉入其中是故菩薩住不動地具得  
此二十五三昧種種力用須彌高廣內於芥  
子中吞吐出没變通自在能入地獄不受碎  
身相等苦若慧聖行成能有是力具如涅槃  
經說三明外用利物者所謂能隱顯二種利  
一隱利益者入王三昧一切三昧悉入其中  
是故一切衆生受諸苦惱一心皈依稱名求  
乞救護菩薩於三昧中即觀三業皆得解脫  
解脫有八種一破伊九二十五有事報之苦二破  
二十五有因苦二十三三破聲聞二十五有見思煩  
惱苦四破緣覺二十五有見思煩惱苦五破  
三藏菩薩二十五有見思煩惱苦六破通教  
三乘人二十五有見思煩惱苦七破別教菩  
薩二十五有恒沙無知別惑苦八破圓教菩

薩二十五有三諦無明之惑苦一心稱名皆得解脫意在此也故說二十五三昧能破二十五有也二顯利益者即是住二十五三昧十法界衆生機緣來感普現色身八番與衆生樂如觀音普門示現神通之相也若有衆生應以佛身得度者即能八相成道現身說法亦是此經明住不思議解脫種種示現也此菩薩初地聖行滿足具足無緣大悲大悲如礫石吸鐵也二明梵行者即是無緣慈悲喜捨菩薩以大涅槃心修於聖行得無畏地有二十五三昧無方大用爾時慈悲是真梵行非餘梵天所修四無量心亦非三藏教通教等衆生緣法緣之慈也菩薩爾時以此慈悲無緣無念熏修衆行無不成辦此之梵行即是一切法故涅槃云慈即如來慈即佛性

伊九

二十三

慈若不具足佛十力三十二相四無所畏者非如來慈故慈力弘深能具足一切福德以自莊嚴名梵行也

四教義卷第五

音釋

啄 竹角切 鷲 疾儼切 鷲鳥名 螫 直立切 蟲藏也 駭 下楷切 驚也 颯 飛物也

四教義卷第六

伊十

隋天台山修禪寺沙門 智顛撰

三明天行者即是中道第一義天天然之理  
猶行顯理因理成行故名理為天行菩薩雖  
入不應住以有所得故又應修上地智慧十

伊十

重發真修慧破蔽顯理成行名為天行天行  
即智慧莊嚴梵行即福德莊嚴上求佛道是  
故有聖行天行下化眾生即有梵行病行嬰  
兒行四嬰兒行者若菩薩福德智慧轉增是  
則實相彌顯雖不作意利益眾生任運能有  
冥顯兩益以天行之力則有冥益以梵行之  
力則有顯益眾生應有小善之機無菩薩開  
發不能生長以慈善根力如礮石吸鐵和光  
利行能令眾生得見菩薩同其始學漸從五  
戒十善人天果報三十三天楊葉之行又示

二百五十戒觀練熏修禪四諦十二因緣三  
十七道品同二乘嬰兒行又示同修習六度  
百劫種相柔伏煩惱六度菩薩小善之行又  
示同即色是空無生無滅通教小善之行又  
示同別教歷別次第相似中道小善之行皆  
是慈心之力俯同羣品提接成就從慈心與  
樂起嬰兒行如涅槃言嬰兒行者能說大字  
所謂婆和此即是同六度也六度是小行而  
求作佛故言大字所謂婆和又云不見晝夜  
親疎等相此即同通教菩薩即色是空第一  
義諦意也又云不能造作大小諸事大事即  
五逆小事即二乘心此即同別教非生死故  
五逆非涅槃故無小乘心云楊樹黃葉即同  
人天五戒十善之嬰兒又云非道為道以能  
生道微因緣故說非道為道即是同二乘嬰

伊十

二

兒故知大慈善根之力能出假化物同其小善方便引之令趣佛慧故名嬰兒行也五病行者此行從無緣大悲起若爾小善必有病行今當分別同生善邊名嬰兒行同煩惱邊名爲病行病行從大悲生衆生病是故我病大悲熏心遊戲地獄同衆生惡業之病如調達在地獄如三禪樂乃至畜生餓鬼脩羅亦如是又同人天有結業生老病死之病又同二乘有見思之病方便附近語令勤作三藏通教菩薩亦如是又同別教塵沙無明之病是故菩薩還同彼病徧於法界利益衆生是爲五行之相也病行即是此經問疾品室內六品之所明也初地菩薩五行具足或是初功德也餘九種功德或可對九地所言破無明見惑者涅槃經云自此已前皆名邪見人

也是則兩教三乘之人皆未見此理故名邪見人也是以大士訶須菩提六師是汝師天魔外道共一手作諸勞侶意在此也乃至別教十信三十心雖伏此惑既未能斷由是成就無明別見訶諸菩薩惑意在此也二從二地至六地名修道者斷別惑三界愛如智論明迦葉聞甄迦琴聲不能自安云三界五欲我已斷竟此是菩薩淨妙功德所生五欲故於是事不能安忍例色愛無色愛亦復如是此是此經大士訶須菩提云同於煩惱不到彼岸入於八難不得無難意在此也故從二地至六地通名修道斷此別惑也今以義推二離垢地即侵斷別教欲愛名斯陀含向三明地即是別教斯陀含果四炎地即是別教阿那含向五難勝地即是別教阿那含果斷

別惑愛欲盡也六現前地即是別教阿羅漢  
向斷別色無色愛也七遠行地即是別教阿  
羅漢果斷別無色愛盡故從此名無學道也  
問曰此對四果出何經論答曰別教明斷伏  
對四果經論多不同也諸大乘法師所用亦  
異地論師通教判位云初地斷見二地斷欲  
愛三地斷色愛四地斷無色愛地論師通宗  
判位有用三地斷見名須陀洹從四地至六  
地名斯陀含第二依法師七地名阿那含第  
三依法師十地等覺名阿羅漢是第四依法  
師有三地斷見四地名斯陀含五地名阿那  
含六地名阿羅漢有用仁王經四地斷見五  
地名斯陀含六地名阿那含七地名阿羅漢  
如是等異說不同難可定依今以義推作四  
對四果也一往似便既無的文佛意難解不

須局執問曰何故解釋不定答曰已如前釋  
八不動地即是別教辟支佛地地論師云從  
此明無學道未知的出經論不但八地得無  
生忍寂而常用用而無相無用心自然斷  
法界無明色習盡也九善慧地無明稍薄斷  
心習盡慧轉分明善入實相也十法雲地慈  
悲智慧由若大雲慈悲普洽一切皆雨慧雲  
能持十方諸佛所說法雨斷無量品無明也  
六等覺地者即是邊際智滿入重玄門若望  
法雲名之為佛望妙覺名金剛心菩薩亦名  
無垢地菩薩三魔已盡餘有一品死魔在斷  
無明習也問曰前通教何意不辯等覺佛耶  
答曰界內習氣易盡故不須開法雲出等覺  
也問曰別教經論何故處處明法雲之後更  
有金剛等覺自有經論止明十地行滿便成

佛果南北法師抑諍論此義答更立等覺未足爲疑所以然者華嚴經明法雲地功德智慧用比於佛如爪上土方於大地若爾雖說一品無明而實不可說品何以得知後心菩薩無功用道其疾甚風一日之間能破無量品無明障惑何況瓔珞經明等覺地於百千萬劫入重玄門報修凡夫事是故開法雲更立金剛心等覺佛於理無失若知一品有無量品無明用法雲無礙之智即盡復何須開出等覺地耶妙覺者金剛後心朗然大覺妙智窮源無明習盡名真解脫蕭然無累寂而常照名妙覺地常住佛果具足一切佛法名菩提果四德涅槃名爲果果問曰爲定用金剛智斷無明爲用妙覺斷無明耶答曰涅槃云有所斷者名有上士無所斷者名無上士

伊十

五

問曰勝鬘經云無明住地其力最大佛菩提智之所能斷答曰若用別接通十地等覺即是佛菩提智所以者何涅槃經云九住菩薩名爲聞見十住菩薩名爲眼見雖見佛性而不了了以無礙道惑共住故不了了諸佛如來了了見者即真解脫蕭然累外故了了也若別教明義從初歡喜地即用佛菩提智斷初品無明乃至等覺後心方乃斷盡若圓教明義即是初發心住得用佛菩提智斷初品無明乃至等覺後心方斷盡也第四約圓教明位釋淨無垢稱義者圓教詮因緣即中道不思議佛性涅槃之理菩薩稟此教門理雖非淺非深而證者不無淺深之位今明圓教入道亦具四門一有門二空門三空有門四非空非有門圓教雖有四門而諸大乘經意

多用非空非有門以明位也正如此經諸菩薩各說入不二法門一往雖同細檢不無四門之別而多用非空非有門入不思議解脫也此義在下自當可見若隨機利物四門赴緣皆入不思議解脫豈可偏用但一往明行

位義便事須如此是以今明圓教次位正約非空非有門以辯也就此即為五意一簡別圓二教明位不同二正明圓教辯位三引眾經論證四料簡五約圓教位釋淨無垢稱義第一簡別圓兩教明位不同者圓教既詮圓理菩薩稟教圓斷五住之惑開佛知見住大涅槃是則教圓理圓智圓斷圓行圓位圓因圓果圓不同別教具如前說今略更用五義釋別圓兩教不同之相也一約斷無明判位高下不同二約斷界內界外見思不同三約

斷不斷不同四約位明法門別圓不同五約位通不通不同一約斷無明高下不同者若別教明位三十心斷界內結盡即伏界外無明至迴向後心初地方發真智斷無明一品乃至斷十品名為十地等覺後心斷無明方盡妙覺常果蕭然累外無所斷也此如前說若圓教所明從初隨喜心修一心三觀入十信位斷界內惑盡即伏界外無明十住初心即發真智斷無明住地初品從此四心皆斷無明至等覺後心無明方盡妙覺極地蕭然累外名究竟菩提無上涅槃也此則判位高下殊別故有圓別二教明位不同也二約斷界內界外見思無明不同者若別教三十心斷界內見思伏界外無明十地斷界外見思無明分為三道如前別教明十地中分別若

圓教十信斷界內見思圓伏界外見思無明發趣初心圓斷界外見思無明終至等覺方盡故地持論明清淨淨禪云離一切見清淨淨禪煩惱智障斷清淨淨禪此並等覺之位明此義也大涅槃云十地菩薩為無我見論惑之所轉也即是斷見不盡之義又十地菩薩雖見佛性而不了了諸佛如來見於佛性而得了了此皆約見惑盡不盡故有了了不了了殊也斷欲愛至佛果方盡者欲愛即是六欲央搖經云所謂彼眼根於諸如來常具足無減修了了分明見乃至意根亦復如是如法華經說六根清淨雖未得無漏而其六根清淨如此當知即是伏欲愛煩惱之位發趣初心發真無漏即分斷欲愛至等覺方盡故華嚴經明得佛六根究竟清淨也斷色愛

至等覺方盡者大涅槃云因滅是色獲得常色名為色解脫涅槃色愛方盡斷無色至佛方盡者因滅是受獲得常受想行識亦如是是名受想行識解脫涅槃無色愛方盡也四住惑與無明合四住若盡無明亦盡若無明盡四住亦盡是則圓伏圓斷圓盡大品云色無邊故般若波羅蜜無邊陰入界一切諸法皆亦如是又云諸法等故般若波羅蜜亦等此經云於食等者諸法亦等諸法等者於食亦等以一食施一切若能如是乃可取食食法尚等況復見思無明所緣之法而平等耶如此之義豈與前別教斷伏而不異乎經說依了義經勿依不了義經三約斷不斷不同者至論其理虛無無明體性本自不有既無無明何論智慧無解無惑豈可分別別圓之

殊故涅槃云誰有智慧誰有煩惱而言毗婆舍那能破煩惱此則不論斷與不斷而涅槃云暗時無明明時無暗有煩惱時則無智慧有智慧時則無煩惱今約有智慧無煩惱義故說為斷若約別教多就定相論斷即是思

議智斷明位大乘之拙度也若圓教明義多說不斷不斷而斷者即是不思議斷非次位以明次位正是大乘巧度之義故此經云姪怒癡性即是解脫又云不斷癡愛起於明脫問曰義推斷不斷有三十六句今何意分斷屬別教不斷屬圓教耶答曰此兩句是佛法正意餘皆是傍不斷而入位義同須彌入芥子此是不思議智斷之位也四約法門別圓簡別者別教明位對諸法門非但法門不圓約位亦有劑限如十地論云初地具足檀波

羅蜜於餘非為不修但隨力隨分是義有餘圓教明諸法門不如是一法門具足一切法門悉皆通至佛地也五約位通不通簡別不同者若別教明位初地不得通二地何況具足諸地若圓教明位如華嚴經說從初一地具足一切諸地功德第二正明圓教位者亦還約七位明五十二位不同一十信二十住三十行四十迴向五十地六等覺地七妙覺地但解者不同有師言圓教頓悟一悟即是佛無復位次差別之殊說十地位者為鈍根之人耳如思益云如此學者即不從一地至一地又有師解云圓教既是頓悟初心一悟即究竟圓極而有四十二位者但是化物方便立淺深之名耳故楞伽云初地即二地二地即三地寂滅真如有何位次也又有師云

圓教初頓悟至十住即是十地而說有十行十迴向十地者此是重說意謂此諸解釋悉是偏取但平等法界尚不論悟與不悟孰論淺之與深不悟而論悟者不淺不深而論淺深也尋諸大乘經明理究竟無過華嚴大集大品法華涅槃雖明法界平等無說無示而菩薩位行終自炳然是以今還約七位以明圓教菩薩之位也一明十信位者為四意一明因法生信二明因信修行三明因行入位四明經說不同一明聞法生信者上根利智聞圓教詮因緣即中道明無作四實諦理即便信解一實諦即是如來虛空佛性非世間非出世間非因非果不可宣說非可顯示無說而說說世間因果即是無作若集說出世間因果即是無作道滅故此經大士訶彌勒

云佛知一切衆生畢竟寂滅即涅槃相不可復滅一切衆生即菩提相若知涅槃即生死是為無作之苦諦若知菩提即煩惱是為無作之集諦若知生死即涅槃是為無作之滅諦若知煩惱即菩提是為無作之道諦祇以非生死非涅槃非菩提非煩惱十是一實諦論此四諦者即是無作四實諦也所以者何約一實以明四一實諦不作於四四不自作四不他作四亦非共作四亦非無因緣而作四也而說為四者此是無作之四此四畢竟不可得即是一實諦名為無作四實諦也若聞此信解無礙者即信一切衆生即是不思議解脫即是大乘即是般若即是首楞嚴定即是佛性即是法身即是實相即是中道第一義諦即是如來藏即是法界即是畢竟空即

是一切佛法因此慈悲誓願菩提心發是爲圓教名字即之信解也二明因信修行者因此名字信心即已發菩提心若欲行菩薩道應當受持讀誦解說書寫大乘經典末世人若欲疾得入十信位具六根清淨但起精進不惜身命應當加修四種三昧四種三昧者一常坐三昧如文殊般若經說二常行三昧如般舟經說三半行半坐如方等經法華經說四非行非坐三昧即諸大乘經說種種行法此諸三昧行法具如諸大乘經中說此即代於初停止觀今約圓教明修初信心行諸三昧應信解十法十法者如前三觀中說一善識思議不思議因緣者思議因緣如上三教所明不思議因緣者即是今所說不思議無作四實諦如前三觀中明譬一念眠心具

伊十

十一

一切法不縱不橫即是不思議因緣無作四實諦也如此的取淨名大士訶彌勒云一切衆生即大涅槃即菩提相明此不思議因緣餘九法亦如是義意玄隱今次第明尋者可善思之二次明真正發心者即是無緣慈悲無作四弘誓願也無緣大慈觀生死即涅槃煩惱即菩提與衆生此滅道之樂也無緣大悲觀涅槃即生死菩提即煩惱欲拔衆生此虛妄之苦也無作四弘誓願者知涅槃即生死未度苦諦令度苦諦也知菩提即煩惱未解集諦令解集諦也知煩惱即菩提未安道諦令安道諦也知生死即涅槃未得涅槃令得涅槃也菩薩如是慈悲誓願無緣無念而覆一切衆生由如大雲不加功用如磁石吸鐵是名真正菩提心也三明行菩提道勤修

止觀者若知生死即涅槃即是善修止也若知煩惱即菩提即善修觀也如陰陽調適萬物長成若巧修止觀即能一心具萬行也問曰以何為集答曰依此經及涅槃住無明愛一切煩惱為集諦集屬於苦於今對義為便也四明破諸法徧者若知生死即涅槃即破分段變易二種生死皆徧若知煩惱即菩提則破一切界內外煩惱徧也譬如轉輪聖王能破一切強敵亦不有所破般若波羅蜜亦復如是能破一切法亦不有所破五善知通塞者知生死即涅槃煩惱即菩提則一切皆通知涅槃即生死菩提即煩惱則一切皆塞六善修道品者觀十法界五陰生死即是法性五陰法性五陰即是性淨涅槃即是四念處破八倒知涅槃即生死顯四枯也知生死

即涅槃顯四榮也知一實諦即是見虛空佛性住大涅槃也因此四念處修正勤如意足根力覺道即道品善知識由是成正覺亦是莊嚴雙樹是則煩惱即菩提也七對治助道修諸波羅蜜者知菩提即是重惡煩惱是以知生死即涅槃以起對治諸波羅蜜諸度法等侶助知煩惱即是菩提開三脫門對治若成煩惱即菩提也八善識位次者涅槃即生死菩提即煩惱此是理即若知生死即涅槃煩惱即菩提是為名字即因此觀行分明成五品弟子即是觀行即得六根清淨名相似即成四十一地即是分證真實即證妙覺果即是究竟即若能善解此之次位即不起大乘增上慢大乘旃陀羅之過罪也九安忍成就者若知生死即涅槃即不為陰界入境病

患境業相境魔事境禪心境二乘境菩薩境之所壞也若知煩惱即菩提即不為煩惱境諸見增上慢境之所壞能忍此無作苦集不為所壞者此如大智論說能忍成道事不動亦不退是心名薩埵也伊十十順道法愛不生者觀生死即涅槃生一切諸禪定三昧等功德十三觀煩惱即菩提生諸陀羅尼門四無所畏十八不共法四無礙智一切種智於順道法不受不著若生愛著是名頂墮知如虛空不住不著即得成初心心乃至十信心也三明因修十法八十信心者解正因緣不思議無作四諦即修初心心信平等法界佛法三寶也二真正發菩提心慈悲誓願憐愍一切即是修念心三勤修止觀成一切萬行即是修進心也四用觀破諸法徧即是巧修慧心五止

心澄靜一切得失通塞之相自現即是修定心也六道品次第增長善根不退不沒即是修不退心七迴事中諸度助開三解脫門即是修迴向心八善知次位所防增上慢離旃陀羅業即是修護法心九安忍成就內外惡法皆不得生即是修戒心十順道法愛不生若願求勝果即不愛著所得淺近法門故名願心是以菩薩知生死即涅槃知煩惱即菩提故能巧修此十法即是修十信心名觀行即因此若得三昧陀羅尼得入初心心位如此一信有十信有百成鐵輪十信心位住此信中得六根清淨功德不可思議如法華經說是名圓教柔順忍位亦是圓教之暖頂忍世第一法之位也故仁王般若云十善菩薩發大心長別三界苦輪海故知住此十信十四

之位斷界內見思盡破界內界外塵沙無知  
伏無明住地之惑也四明經說不同者如華  
嚴經法慧菩薩答正念天子明菩薩觀十種  
梵行空學十種智力入初住位即是此教十  
信位也所以者何觀十種梵行空即是一實  
諦學十種智力即是觀無作四諦此經即是  
方等之教明即大涅槃即煩惱相若止若觀  
生相似解即是瓔珞經明十信大品云是乘  
從三界中出也十法成乘如前三觀中說初  
出三界即十信也又大品經云譬如入海先  
見平相即是仁王經明十善菩薩發大心長  
別三界苦輪海法華明入如來室著如來衣  
坐如來座此即是修四安樂行行處近處得  
六根清淨住十信位普賢觀經明修大乘人  
未得無生忍前有十種證相此即是十信之

位涅槃云復有一行是如來行所謂大乘大  
般涅槃如大智論云菩薩從初發心即觀涅  
槃行道若觀涅槃行道生相似解即是一行  
是如來行也二明十住者十住名前說竟今  
明初發心住略為四意一正釋初發心住二  
明經說不同三略辨功德四類明九住一正  
釋初發心住位者所言發心住者三種心發  
故名發心住三德涅槃名為住也云何名為  
三種心發一者緣因善心發二者了因慧心  
發三者正因理心發一緣因善心發者眾生  
無量劫來所有低頭合掌彈指散華發菩提  
心慈悲誓願布施持戒忍辱精進禪定等一  
切善根一時開發一心具足萬行諸波羅蜜  
也二了因慧心發者眾生無量劫來聞大乘  
經乃至一句一偈受持讀誦解說書寫觀行

修習所有智慧一時開發成真無漏也三正  
因理心發者衆生無始以來佛性真心常爲  
無明之所隱覆緣了兩因力破無明暗朗然  
圓顯也此三種心開發故故名發心二住三  
德涅槃名之爲住者一法身二般若三解脫  
此三不縱不橫如世伊字名祕密藏真實心  
發即是法身了因心發即是般若緣因心發  
即是解脫三心既發同世伊字假名行人以  
不住法住此三心即是住於三德涅槃祕密  
之藏故言初發心住也若住三德之理即是  
住不思議解脫即是住於大乘以不住法住  
於般若即是住首楞嚴三昧修持於心猶如  
虛空即是住法性即是住實相即是住如如  
即是住如來藏即是住中道第一義諦即是  
住法界即是住畢竟空即是住大慈悲即是

住十力即是住四無畏住十八不共法四無  
礙智住大悲三念處住大神通住四攝法住  
諸波羅蜜一切三昧一切陀羅尼門舉要言  
之即是住真應二身一切佛法也二明諸大  
乘經初發心住名義不同者華嚴經云初發  
心時便成正覺了達諸法真實之性所有聞  
法不由他悟是菩薩成就十種智力究竟離  
虛妄無染如虛空清淨妙法身湛然應一切  
當知此即是發真無漏斷無明初品也即是  
此經明一念知一切法是道場成就一切智  
故又即是此經入不二法門得無生法忍也  
即是大品經明從初發心即坐道場轉法輪  
度衆生當知此菩薩爲如佛又大品經明菩  
薩從初一日行般若智慧由如日光假使舍  
利弗目捷連滿閻浮提四天下如稻麻竹菁

智慧欲比菩薩如滿閻浮提四天下螢光欲比日月光也又即是大品經阿字門所謂一切法初不生也即是法華經云為令眾生開佛知見又法華云龍女於剎那頃發菩提心成等正覺即往南方無垢世界坐道場轉法輪也即是大涅槃云發心畢竟二不別如是二心前心難即是涅槃經復有一行是如來行所謂大乘大般涅槃初住分證涅槃也如此等諸大乘經悉是圓教明初發心住也三  
明初發心功德發心功德無量無邊非是凡夫二乘所測不可宣說今採大乘經意略以十種法門稱述初住圓滿功德一者住圓滿清淨菩提之心即是無生法忍無緣慈悲無作誓願普覆法界二於一念中成就一切萬行諸波羅蜜三得一切種智圓斷法界見思

四十一

十七

無明四明佛眼圓見十法界三諦之法五圓入一切法門所謂得二十五三昧入王三昧一切三昧悉入其中冥益眾生八番破二十五有六成就菩薩圓滿業能顯一切神通所謂三輪不思議化彌滿法界顯益眾生八番利益二十五有七能成就眾生開權顯實入一乘道八能嚴淨一切佛土如佛國品所明九能起法界三業供養一切十方諸佛得圓滿陀羅尼受持一切佛法如雲持雨十能從一地具足一切諸地功德心心寂滅自然流入薩般若海故華嚴明初住菩薩所有功德三世諸佛歎不能盡佛若具足說一切凡夫人聞迷亂心發狂在此乃不思議難解之事諸大乘了義經之所稱說豈同通教所明十住功德比格此明初住與別教初地智斷功德

神通變化一往是齊與經論所說或深或淺  
意有所在四類釋九住者如此初住三觀現  
前無功用心念念斷法界無量品無明不可  
稱計一往大分略為十品智斷即是十住故  
仁王經云入理般若名為住即是十番進發  
無漏真明同入中道佛性第一義諦之理以  
不住法從淺至深住佛三德涅槃之理即是  
十品住一切佛法故名十住地三明十行者  
即於佛性第一義諦無漏真明一心具一切  
行念念進趣流入平等法界海破十品無明  
成十品智斷一切諸行諸波羅蜜不可思議  
增長出生自行化他功德與虛空法界等故  
名十行也四明十迴向者無功用不思議無  
漏真明念念開發增長一切法界願行事理  
和融心心寂滅自然迴入平等法界薩婆若

十

十八

海又進破十品無明證十品智斷故名十迴  
向也五明十地者無漏真明入無功用道猶  
如大地能生一切佛法能荷負法界眾生普  
入三世佛地廣大如法界究竟如虛空又進  
破十品無明成就十品智斷約此以明十地  
也六明等覺地觀達無始無明原本邊際智  
滿畢竟清淨斷最後窮源微細無明登中道  
山頂與無明父母別是名有所斷者名有上  
士也七明妙覺地者究竟解脫無上佛智故  
言無所斷者名無上士也此即是三德不縱  
不橫究竟後心大涅槃也是大涅槃名諸佛  
法界豎深橫闊能用二十五三昧普化眾生  
隱顯十番利物究竟周普譬如大樹其根若  
深入枝條亦大若實相智慧窮源盡性化用  
之功則彌滿法界無方大用究竟圓極也故

智論云智度大海佛從來智度深海佛窮底也  
大品經云過茶無字可說涅槃云不生不生  
不可說也若作如此而辯位者皆是寂滅  
真如平等法界不思議無次位之次位也第  
三引衆經證成圓教位者大涅槃明月愛三

伊十

十九

昧從初一日至十五日光明漸漸增長又從  
十六日至三十日光明漸漸盡月光漸漸增  
長譬智德十五摩訶般若光明漸漸減盡譬  
十五斷德無累解脫無明漸減盡也十五種  
智斷者三十心爲三智斷十地爲十智斷等

覺爲一智斷妙覺爲一智斷合爲十五智斷  
故從初一日至十五日故以月爲譬也月體  
即譬法身法身是一光明漸增譬般若智德  
不生而生光明漸減譬解脫斷德不滅而滅  
故涅槃經明從初安置諸子祕密之藏三德

涅槃然後我亦當於此祕藏而般涅槃此最  
後究竟涅槃名爲不生不生般若畢竟不生  
不生不滅不滅更無惑可滅也問曰若是圓  
位頓悟一證即便究竟何得引月愛三昧十  
五日月喻答曰一向無淺深已如前破但證  
位是諸佛境界凡夫未證豈可定執今借十  
五日月喻者此約不可喻中而論喻也故經  
云又解脫者名無譬喻無譬喻者即真解脫  
譬如面如滿月實非無有五根相同彼月也  
問曰何得知月喻譬地位答勝天王般若具  
出此義也問曰若約佛性中道爲無明所覆  
何得定有四十二品答曰此義前已略明無  
明雖無所有不有而有不無淺深階品一徃  
大分爲四十二品然論品數實自無量無邊  
不可說爾故智論云無明品類其數甚多是

伊十

二十

故處處說破無明三昧又云法愛難盡處處  
云重說般若也法華云諸佛為一大事因緣  
故出現於世為令眾生開佛知見示佛知見  
悟佛知見入佛知見道故此之四義南嶽師  
解云開佛知見即是十住示佛知見即是十  
行悟佛知見即是十迴向入佛知見即是十  
地及等覺地皆言佛知者悉得一切種智也  
皆言佛見者悉得佛眼又結句云是為諸佛  
一大事因緣者同入一乘諸佛實相也又云  
唯佛與佛乃能究盡諸法實相又火宅品諸  
子門外索車長者各賜諸子等一大車是時  
諸子乘此寶乘遊於四方嬉戲快樂自在無  
礙直至道場言四方者即譬開示悟入四位  
也直至道場即是究盡諸法實相妙覺極位  
如此皆是明圓位之異名也大品經明字等

語等四十二字門南嶽師解云此是諸佛密  
語表四十二心之位若學問人多疑此語謂  
大智論無此釋然龍樹釋大品經論有千卷  
什師並略何必無此釋也今謂此釋實應冥  
會所以然者經說初阿後茶中有四十二字  
初阿字門具四十二字後茶字門亦具四十  
二字華嚴經云從初一地具足一切諸地功  
德詳此義意極以相關又大品經云若聞初  
阿字門則解一切義所謂一切法初不生故  
此豈非圓教菩薩初得無生法忍之位耶過  
茶無字可說此豈非妙覺極地無上無過不  
可過此字有法而可說耶又大品廣乘品說  
一切法門竟即說四十二字豈非是圓教菩  
薩從初發心得諸法實相具一切佛法故名  
阿字至妙覺地第一一切諸法源底故名茶字

作此解釋圓教之位極似分明又四十二字門後即說十地此即是顯別教方便之次位也又次十地說三乘共十地即是顯通教方便之位也經文三處然決比圓別通三教顯在大品經文也故大品云是乘從三界中出到薩婆若中又三慧品云菩薩從初發心修習三慧至坐道場仁王般若云三賢十聖忍中行唯佛一人能盡源前所引思益楞伽等經明寂滅真如有何次位即是無次位之次位也又瓔珞經云三賢菩薩心心寂滅自然流入薩婆若海華嚴經明四十一位既是圓頓之教明圓位之意甚自分明但有時開別教方便之說事相隔別似如淺近故十地論師作教道證道二道明義或作地相地實二種明義正是爲修別教方便事相之文也又

云一切無礙人一道出生死也智論云菩薩從初發心觀涅槃行道乃至坐道場又云菩薩從初發心觀諸法實相慧名爲般若波羅蜜至佛心中變名一切種智譬如大海有始入者有入至半者有到彼岸者皆名入海菩薩亦爾從初發心觀諸法實相實相雖一而觀智不無淺深之殊也第四料簡問何不依大乘經論對諸法門明位答曰今引此等經論釋成圓教次位者此約不思議平等法界辯不思議非次位之次位也若別對法門尋者若不得意多別解別執則失圓通中道之正意不思議諸佛菩薩之次位也是事非凡夫所知止可仰信而已故華嚴經云諸地不可說何況以示人所以然者且置大乘懺悔發初隨喜一信心獲一旋陀羅尼門已不可

向一切人說設復種種分別亦不可解何況  
圓教四十二字法門二乘尚不聞其名豈有  
凡夫而能說耶且置是事如聲聞法中學四  
念處發暖法時亦不可向一切外凡未證者  
說設種種因緣而解說者終不能解豈況圓  
教諸佛菩薩行位而可知可說耶且置是事  
如世凡人坐禪發五支功德尚不可爲未證  
者說設方便巧說未證之者亦不能解豈況  
諸佛菩薩地位法門而可分別耶末代法師  
多取經論方便所明斷伏對諸法門釋大乘  
賢聖地位執諍云云今意不爾所以者何如  
水性至冷飲者方知心無實行何用問爲是  
以今辯四教四位者出諸經論此乃諸佛權  
實法門於四不可說中用四悉檀而說此是  
諸佛大菩薩境界非諸小菩薩聲聞緣覺所

字

二十三

知豈況末代凡夫所能解也深囑一家學道  
說法之者自非得證分明慎勿偏執經論諸  
佛菩薩方便赴緣之言空諍不思議不可測  
量之行位也普願法界衆生歸僧息諍論入  
大和合海也第五約五味譬顯四教位者大  
涅槃經明五味譬不同以成四教辯位不同  
之相也經云凡夫如乳須陀洹如酪斯陀含  
如生酥阿那含如熟酥阿羅漢辟支佛如醍  
醐此譬意恐是顯三藏教所明位也經又云  
凡夫如乳聲聞如酪辟支佛如生酥菩薩如  
熟酥佛如醍醐此譬意恐是顯通教明位也  
經又云凡夫如雜血乳羅漢如清淨乳支佛  
如酪菩薩如生熟酥佛如醍醐此譬意恐顯  
別教明位也經又云雪山有草名曰忍辱牛  
若食者即得醍醐忍辱草者喻八聖道乳喻

十二部經隨有能修八聖道者即見佛性住  
 大涅槃此即譬於圓教菩薩從初發心即開  
 佛知見見於佛性住大涅槃也涅槃明此之  
 四譬譬四教明位其義宛然若不信四教明  
 位不同者云何銷釋經此五味四種譬也今  
 用前四教明位合此四譬一往似如目覩祇  
 自聖人密意難知何可定執又涅槃云譬如  
 有人置毒乳中乃至醍醐亦能殺人此譬應  
 得兩用若對經教五味明義處處皆得見佛  
 性入涅槃也此即是不定教門事在下釋若  
 是約位明殺人義四位五味根緣不定隨其  
 大乘機發即皆以如來滅度而滅度之故同  
 殺人之義也第六辯眾經明四教位多少不  
 同者華嚴頓教但明別圓兩位漸教之初聲  
 聞經但明三藏教三乘之位若方等大集具

用四教明位摩訶般若但明通別圓三教之  
 位若法華經但明圓教一佛乘開示悟入之  
 位大涅槃經亦具明四教之位俱通大乘明  
 二乘如前但通教菩薩位用別接通名佛性  
 四德涅槃三藏二乘如前廢三藏大乘之位  
 無復三阿僧祇劫伏結之因三十四心斷結  
 之果二涅槃也又通教三藏教明二乘位至  
 大涅槃俱引入別圓二位也問曰若廢三藏  
 佛位何得言羅漢辟支佛佛如醍醐耶答三  
 位俱界內結盡此結成往昔之義非今之所  
 用也

四教義卷第六

音釋

嬰於京切 礎才茲切 石可引鐵 劑才詣切  
 嬰嬰孩也 礎可引鐵 劑限量也